

四庫全書

子部

欽定四庫全書

子部

唐語林卷五

詳校官侍講學士<sub>臣</sub>平恕

侍讀<sub>臣</sub>孫球覆勘

總校官候補中允<sub>臣</sub>王燕緒

校對官學錄<sub>臣</sub>謝登雋

謄錄監生<sub>臣</sub>汪國均

欽定四庫全書

唐語林卷五

宋 王彥撰

補遺

起高祖至代宗 案以下補遺四卷並采自永樂大典原分門目已不可考見今畧以時

代為次無時代者編附于後

高祖既受隋禪坐太極前殿會朝之次忽報南山急賊不測安南大首領馮盎前奏曰急擊之必退散無能為也遣百騎禦之俄頃報賊南通上召盎曰卿安能遠料

賊果敗退盜曰奏報之時臣望氣雲形似樹辰在金金能克木擊之必勝上喜面賜金帶

武德末年突厥至渭橋控弦四十萬太宗初親庶政驛召李衛公問策時發諸州府軍未至長安居人勝兵者不過數萬突厥精騎騰突挑戰日數十合帝怒欲擊之靖請傾府庫邀其歸路帝從其言突厥兵遂退於是據險邀之遂棄老弱而遁獲馬數百匹金帛一無遺焉李密掛漢書牛角行且讀



隋大業中李衛公上書高祖終不為人臣請速去之後  
高祖入京師靖與滑儀衛文升等俱見收衛滑既死太  
宗慮囚見靖引與語因請於高祖免之始隨趙郡王孝  
恭南征清巴漢擒蕭銑蕩一揚越師不留行皆靖之力  
也

英公始與單雄信俱仕李密結為兄弟密既亡雄信降  
世充勸來歸國雄信壯勇過人勸後與海陵王元吉圍  
洛陽元吉恃膂力每行圍世充召雄信告之酌以金碗

雄信盡飲馳馬而出槍不及海陵者一尺勣惶遽連呼  
曰阿兄此是勣主雄信乃攬轡而止顧笑曰胡不緣爾  
且竟死世充既平雄信將就戮英公請之不得泣而退  
雄信曰我固知汝不了勣曰平生誓共灰土豈敢相忘  
但將身許國義不兩合雖不死之且顧兄妻子如何因  
以刀割其股肉以授信曰示不虧前誓雄信食之不疑  
高宗立武后褚河南謀於趙公無忌英公勣將以死爭  
趙公請先入褚曰太尉國之元舅脫事不如意使上有

惡舅之名不可英公勸請先入褚曰司空國之元勳有  
不如意使上有遂良臣之名不可遂良出自草茅無汗  
馬之功蒙先帝殊遇以有今日自當不諱之時躬奉遺  
詔若不効其愚衷何以下見先帝揖二公而入帝深納  
其言事遂中寢

中宗正位後有武當縣丞壽春周憬慷慨有節義乃與  
王駙馬同皎謀誅武三思事發同皎見害憬逃於比干  
廟中刎死臨死謂曰比干紂之忠臣也儻神道有知明

我以忠見殺

虬鬚客姓張氏赤髮而虬鬚時楊素家紅拂妓張氏奔李靖將歸太原行次靈橋驛既設牀爐中爇肉張氏以髮長垂地立梳牀前靖方刷馬忽虬鬚客乘驢而來投革囊于爐前取枕鼓卧看張氏梳頭靖怒未決張氏熟視其面一手映身搖示靖令勿怒急急梳頭畢斂衽前問其姓氏卧客曰姓張張氏對曰妾亦姓張合是妹遽拜之問第幾曰第三亦問第幾曰最長遂喜曰今日幸

逢一妹張氏遙呼曰李郎且來拜三兄靖驟拜之遂環  
坐客曰煮者何肉曰羊肉計已熟矣客曰飢靖出市胡  
餅客抽腰間匕首切肉共食之竟以餘肉亂切飼驢客  
曰何之曰將避地太原客曰有酒乎曰主人西則酒肆  
也靖取酒一斗既巡客曰吾有少下酒物李郎能同食  
乎靖曰不敢遂開革囊取出一人頭并心肝却以頭貯  
囊中以匕首切心肝共食之曰此天下負心者也銜之  
二十年今始獲之吾憾釋矣又曰觀李郎儀形器宇真

丈夫也亦聞太原有異人乎曰嘗識一人余謂之真人也其餘將相而已曰其人何姓曰某之同姓年幾曰僅二十曰今何為曰州將之子也曰李郎能致吾一見乎曰靖之友劉文靜者與之善因文靜見之可也然兄欲何為曰望氣者云太原有奇氣使吾訪之李郎何日到太原曰靖計之某日當達曰達之明日方曙候我于汾陽橋言訖乘驢而去其行如飛迴顧已失矣公與張氏且驚且懼久之曰烈士不欺人固無畏也促鞭而行及

期入太原候之相見大喜偕詣劉氏詐謂文靜曰有善相者思見郎君請迎之文靜素奇其人方議匡輔一旦聞客有知人者其心可知遽致酒延之使回而到不衫不履褐裘而來神氣揚揚貌與常異虬鬚默然于坐未見之心死飲數盃而起招靖曰真天子也吾見之十得八九矣然須道兄見之李郎宜與一妹復入京某日午時訪我于馬行東酒樓下有此驢及瘦驃即我與道兄俱在其上矣又別而去之靖與張氏及期訪焉宛見二

乘攬衣登樓而虬鬚與道士方對飲見靖驚喜召對環  
飲十數巡曰樓下匱中有錢十萬可擇一深隱處駐一  
妹某日復會我于汾陽橋下靖如期至則道士與虬鬚  
已先到矣仍俱詣文靜時方奕碁揖起而話心焉文靜  
飛書迎文皇看道士對奕虬鬚與靖旁立焉俄而文皇  
到來精彩驚人揖而坐神氣清朗滿坐風生顧盼偉如  
也道士一見慘然失碁子曰此局輸矣輸矣于此失却  
局奇哉救無路矣復奚言奕罷請去既出謂虬鬚曰此



世界非子世界他方圖之可矣勉之勿以為念因共入  
京虬鬚曰計李郎之程某日方到到之明日可與一妹  
同詣某坊小宅相訪欲令新婦祇謁兼議從容無前却  
也言畢吁嗟而去靖策馬而歸遂與張氏同往見一小  
板門扣之有應者云三郎令候李郎一娘子久矣延入  
重門門愈壯麗奴婢四十餘人羅列庭前奴二十人引  
靖入東廳婢二十人引張氏入西廳廳之陳設頗極精  
異巾箱粧奩冠蓋首飾之盛非人間之物巾櫛既畢又

請更衣衣甚珍奇既畢傳云三郎來乃虬鬚也紗帽褐  
裘亦有龍虎之狀歡然相見催其妻出拜蓋真天人也  
于是四人對坐牢饌畢陳女樂列奏其飲食妓樂若自  
天降非人間之物食畢行酒而家人自堂來舁出兩牀  
各以錦繡帕覆之既呈盡去其帕乃文簿鑰匙耳虬鬚  
指謂曰此珍寶貨泉之數吾所有悉以充贈向者本欲  
于此世界求事或當一二十年建少功業今既有主住  
亦何為太原李氏真英主也海內即當太平李郎以奇

特之才輔清平之主竭忠盡行必極人臣一妹以天人  
之資蘊不世之藝從夫之貴榮極軒裳非一妹不能識  
李郎亦不能存李郎非李郎不能遇一妹亦不能榮一  
妹起陸之漸際會如斯虎嘯風生龍吟雲起固當然也  
將予之贈以佐真人贊功業也勉之哉此後十餘年東  
南數千里外有異事是吾得志之秋也妹與李郎可漉  
酒相賀因命家僕列拜曰李郎一妹是汝主也言畢與  
其妻戎裝從一奴乘馬而去數步乃不復見靖據其宅

遂為豪家得以助文皇締構之資遂匡大業貞觀十年  
靖以左僕射同平章事東南蠻奏有海賊以千艘帶甲  
者十萬人入扶餘國殺其主自立國已定靖知虬鬚之  
得志也歸告張氏具禮相賀瀝酒東南祝拜之是知真  
人之興非英雄所覲況非英雄乎人臣之謬思亂者乃  
蟾臂扼轍耳我皇家垂福萬葉豈虛言哉或曰衛公之  
兵法半乃虬鬚所傳信哉

太宗征遼李衛公病不能從帝使執政等召之不果起

帝曰吾知之矣明日駕臨其第執手與別衛公曰老臣  
宜從但犬馬之疾增甚帝撫其背曰勉之昔司馬仲達  
非不老病竟能自強立勲魏室公叩頭曰老臣請輿病  
行至相州疾篤而不能進上至駐驛山高麗與靺鞨合  
軍四十里太宗有懼色江夏王進曰高麗傾國以拒王  
師平壤之守必弱請假臣精卒五千覆其本根則數十  
萬之衆可不戰而降帝不應既合戰為敵所乘殆將不  
振還謂衛公曰吾以天子之衆困于蕞爾之夷何也靖

曰此道宗所解時江夏王在側帝顧之道宗具陳前言  
帝悵然曰當時忽遽不憶也

太宗謂尉遲敬德曰人言卿反何故對曰臣反是實臣  
從陛下討逆伐叛惟憑威靈幸而不死然所存刃鋒也  
今大業已定而反疑臣乃悉解衣投于地以見所傷之  
處帝對之流涕曰卿衣矣朕以不疑卿故以相告何反  
以為恨太宗謂敬德曰朕將嫁女與卿稱意否敬德笑  
曰臣雖鄙陋亦不失為夫婦之道臣每聞古人云富不

易妻仁也竊慕之願停聖恩叩頭固讓帝嘉之而止  
薛萬徹尚平陽公主主人謂太宗曰薛駙馬無才氣因此  
公主羞之不同席者數月帝聞之大笑置酒召諸壻盡  
往獨與薛歡語屢稱其美因對握槊賭所佩刀帝佯為  
不勝解刀以佩之酒罷悅甚薛未及就馬主遽召同載  
而還重之踰于舊日

中書令馬周以布衣上書太宗覽之未及終命召之乃  
陳世事莫不施行

太宗嘗以飛白書賜馬周曰鳳鸞冲霄必假羽翼股肱之寄要在忠力又高宗嘗為飛白賜侍臣戴至德曰泛洪源俟舟楫郝處俊曰飛九霄假六翮李敬元曰資啟沃罄丹誠崔知悌曰罄忠節贊皇猷其詞皆有比興率更歐陽詢行見古碑晉索靖所書駐馬觀之良久而去數百步復還下馬佇立疲倦則布裘坐觀因宿其旁三日而去

李太史與張文叔坐忽見暴風自南而至李曰南五里



當有哭者張以為音樂左右馳馬觀之則遇送葬者有鼓吹焉

褚遂良貴顯其父亮尚在乃別開門敕嘗有所賜遂良使者由正門而入亮出曰渠自有門

太宗宴近臣戲趙公無忌令嘲歐陽率更曰聳膊成山字埋肩不出頭誰教麟閣上畫此一獼猴詢應聲曰索頭連背煖完襦畏肚寒只由心溷溷所以面團團帝敕容曰歐陽詢汝豈不畏皇后聞耶趙公后之弟

侯君集為兵部尚書以罪流嶺南于其家得二美人容  
色絕代太宗問其狀曰自小常食人乳而不飯

侯君集家有金簾二甚精妙御府所無隱而不獻後君  
集獲罪乃于其家得之

太宗朝泥婆羅獻娑羅樹一名菩提葉似紅藍實如蒺  
藜

太宗病出英公為疊州都督謂高宗曰李勣才智有餘  
屢更大任恐其不厭服于汝故有此授我死後可親任

之若遲疑顧望便當殺之勸奉詔不及家而去

唐貞觀元年長安客有買妾者居之數年嘗忽不知所  
之一夜提人首而告夫曰我有父冤故至此今報矣請  
歸涕泣而訣出門如風俄頃却至斷所生子喉而去

袁利貞為太常博士高宗將會百官命婦于宣政殿並  
設九部樂利貞諫曰臣以前殿正寢非命婦宴會之地  
象闕路寢非倡優進御之所請命婦會于別殿九部樂  
從東西而入散樂一色伏望停省若于三殿別所可備

極恩私高宗即令移于麟德殿至會日中書侍郎薛元超謂利貞曰卿門傳忠鯁所獻直言不加厚賜何以獎勸賜綵百匹遷祠部員外

高宗腦癰殆甚待詔秦鳴鶴奏曰須針百會方止則天大呼曰天子頭上可是出血處上曰朕意欲針即時眼明云諸苦悉去殊無妨也則天走于簾下自負銀錦等賞賜如向未嘗怒也

高宗將下詔遜位于則天攝知國政召宰臣議之郝處

俊對曰禮經云天子理陽道后理陰德然則帝之與后  
猶日之與月陰之與陽各有所主不相奪也若失其序  
上則謫見于天下則禍成于人昔魏文帝著令崩後尚  
不許皇后臨朝奈何遂欲自禪位天后況天下者高祖  
太宗之天下非陛下之天下正合謹守宗廟傳之子孫  
不可持國與人有私于后惟陛下審詳中書侍郎李義  
琰進曰處俊所引經典其言至忠惟聖慮無疑則蒼生  
幸甚高宗乃止及天后受命處俊已歿孫象竟被族誅

始則天以權變多智高宗將排羣議而立之及得志威福並作高宗舉動必為掣肘高宗不勝其忿時有道士郭行真出入宮掖為則天行厭勝之術內侍王伏勝奏之高宗大怒密詔上官儀廢之儀因奏天后專恣海內失望請廢黜以順天心高宗即令儀草詔左右馳告則天則天遽訴詔草猶在高宗恐有怨懟待之如初且告之曰此並上官儀教我則天遂誅儀及伏勝等並賜太子忠死自此政歸武后天子拱手而已

閻立本總章元年以司平大常伯拜右相有文學善寫真

高宗朝太原王范陽盧榮陽鄭清河博陵崔隴西趙郡李等七姓恃有族望恥與諸姓為婚乃禁其自婚娶于是不敢復行婚禮密裝飾其女以送夫家

武后時投匭者或不陳事而謾以嘲戲之言乃置使閱其書奏然後投之匭匭之有司自此始也初置匭有四門其制稍大難于往來後遂小其制度同為一匭依方

色辨之漢時趙廣漢為潁川太守設鉅簡言事者投書其中匭亦鉅簡之流也梁武帝詔于謗木肺石函旁各置一函橫議者投謗木函求達者投肺石函即今之匭也初則天欲通知天下之事有魚保宗者頗機巧上書請置匭以受四方之書則天悅而從之徐敬業于廣陵作逆保宗曾與敬業造刀車之屬至是為人所發伏誅保宗父承暉自御史中丞坐貶儀州司馬明皇以匭字聲似鬼改匭使為獻納使乾元初復其舊名



洛東龍門香山寺上方則天時名望春宮則天御石樓  
坐朝文武百執事班于水次

國有大赦則命衛尉樹金雞于闕下武庫令掌其事金  
雞為首建之于高橦之上宣赦畢則除之凡建金雞則  
先置鼓于宮城門之左視大理及府縣囚徒至則搥其  
鼓案金雞魏晉以前無聞焉或云始自後魏亦云起自  
呂光隋百官志云北齊尚書省有三公曹赦日建金雞  
蓋自隋朝廢此官而為衛尉所掌北齊每有赦宥則于

閭闔門前樹金雞柱下取少土云佩之利官數日間遂  
成坑所司亦不禁約武成帝即位其後河間王孝琬為  
尚書令先時有謠言河南種穀河北生白楊樹頭金雞  
鳴祖孝徵與和士開譖孝琬曰河南河北河間也金雞  
言孝琬為天子建金雞也齊主信之而殺孝琬則天封  
嵩岳大赦改元萬歲登封壇南有大樹樹杪置金雞因  
名樹為金雞樹

宋璟劾張昌宗等反狀武后不應李邕立階下大言曰

璟所陳社稷大事陛下當聽后色解即可璟奏邕出或讓曰子位卑一忤旨禍不測邕曰不如是名亦不傳

蘇安恒博學尤明周禮左氏長安二年上疏請復子明辟奏疏不納魏元忠為張易之所構安恒又申理之易之大怒將殺之賴朱敬則桓彥範等保護獲免後坐節憫太子事下獄死睿宗即位下詔曰蘇安恒文學立身鯁直成操往年陳疏忠讜可嘉屬回邪擅權奄從非命興言軫悼用惻予懷可贈諫議大夫

近代言樂衛道弼為最天下莫能以聲欺者曹紹夔與  
道弼為樂令比監郊享御史有怒于紹夔欲以樂不和  
為之罪雜叩鐘磬使聞別之無誤者由是反歎服其能  
洛陽有僧房中磬子夜輒自鳴僧以為怪懼而成疾求  
術士百方禁之終不能已曹紹夔素與僧善適來問疾  
僧遽以告俄頃輕擊齋鐘磬復作聲紹夔笑曰明日盛  
設饌余當為除之僧雖不信其言冀其或效乃置饌以  
待紹夔食訖出懷中錯鉢磬數處其聲遂絕僧苦問其

所以紹夔曰此磬與鐘律合故擊彼應此僧大喜其疾便愈

裴知古自中宗武后朝以知音律直太常路逢乘馬聞其聲竊曰此人即當墜馬好事者隨而觀之行未半坊馬忽驚墜殆死又嘗觀人迎婦聞婦佩玉聲曰此婦不利姑是日有疾竟亡其知音皆此類也又善攝衛開元十三年終且百歲

曹懷舜金鄉人父繼叔死王事懷舜授遊擊將軍厯內

外兩官則天嘗云懷舜久歷清資屈武職後轉右玉鈐  
衛將軍

則天時郎吏王上客自恃才藝意在前行外郎後除水  
部員外頗懷憤惋同列張敬忠以詩戲曰有意嫌工部  
專心覓考功誰知腳踏蹬幾落省牆東議者戲云畿尉  
有六道入御史為佛道入評事為仙道入京尉為人道  
入畿丞為苦海道入縣令為畜生道入判司為餓鬼道  
左史東方虬每云二百年後乞爾西門豹作對

蘇味道詞亞于李嶠時稱蘇李崔融嘗戲蘇曰我詞不如公有銀花合也蘇即答猶不及公金銅釘謂今同丁令威也

劉希夷詩曰年年歲歲花相似歲歲年年人不同其舅即宋之問也苦愛此兩句知其未示人懇乞此兩句許而不與之問怒以土囊壓殺之劉禹錫曰宋生不得死天報之矣

張文瓘之為大理獲罪者皆曰為張卿所罰不枉也

張柬之等既遷則天子上陽宮中宗猶以皇太子監國告武氏之廟時累日陰翳侍御史崔渾奏曰方今國命初復當正徽號稱唐順萬姓之心奈何告武氏廟廟宜毀之復唐鴻業天下幸甚中宗深納之制命既行陰雲四霽萬里澄廓咸謂天人之應

中宗時兵部尚書韋嗣立新入三品侍郎趙彥昭假金紫吏部侍郎崔湜復舊官上命燒尾令于興慶池設食至時敕衛尉陳設尚書省諸司各具綵舟遊勝飛樓結



艦先奪霞日上與侍臣親臨焉既而吏部船為仗所隔  
兵部船先至嗣立奉觴獻壽上問吏部船何在崔湜步  
自北岸呼之遇戶部雙舸上結重樓兼聲樂一部即呼  
至岸以紙書作吏部字貼牌上引至御前上大悅以為  
兵部不逮也俄有風吹所帖之紙為嗣立所見遽奏云  
非吏部船上令取牌探紙見戶字大笑嗣立請科湜罪  
上不許但罰酒而已

薛令之閩之長溪人神龍二年趙彥昭下進士及第後

為左補闕兼太子侍講時東宮官冷落之次難進令之  
有詩曰明月夜團團照見先生盤盤中何所有苜蓿長  
闌干飯澁匙難綰羹稀筋易寬只可謀朝夕那能度歲  
寒明皇幸東宮見之不悅以為諷上援筆酬曰啄木啗  
距長鳳凰毛羽短若嫌松桂寒任逐桑榆暖令之遂謝  
病歸及肅宗即位召之詔下而令之已卒

景龍初有韓令珪起自細微好以行第呼朝士尋坐罪  
為姜武畧應云且抵承曹大無煩喚姜五流何故遽行

此姜武畧應云且抵承曹大無煩喚姜五

兵部尚書韋嗣立景龍中中宗與韋后幸其莊封嗣立  
為逍遙公又改其所居鳳凰原為清虛原鸚鵡谷為幽  
棲谷

中宗崩既除喪吐蕃來弔或曰若擇宗室最長者素服  
受禮于彼其可乎舉朝稱善而從之

徐彥伯常侍睿宗朝以相府之舊拜羽林將軍徐既文  
士不悅武職及遷謂賀者曰不喜有遷且喜出軍

和元祐為貞化府長史景龍末元祐獻詩十首其詞猥  
隨皆寓言譬幸而意及兵戍韋氏命鞠于大理而將戮  
之月餘而韋氏伏誅其詩言若符讖景雲初以元祐為  
千牛衛長史

韋鏗初在意司邵炅蕭嵩同昇殿神武皇帝即位及詔  
出炅嵩俱加朝散獨鏗不及炅鼻高嵩鬚多並類鮮卑  
鏗嘲之云一雙獠子著緋袍一箇鬚多一鼻高相對衙  
前捺且立自言身品世間毛鏗白肥而短他日忽于承

天門風眩踣地吳詠曰飄風忽起團團迴倒地還如脚  
被鎚莫怪殿上空行事直為元非五品才

郝昂性捷直源乾曜嘗戲之曰謝安云郝生可謂入幕  
之賓矣豈非遠祖否郝曰猶勝以氏為禿髮若不遇後  
魏道武稱曰同源賜之源氏豈可列姓苑乎源遂屈後  
與杜黃裳同學于嵩陽二人同中第郝以安祿山偽官  
貶歙縣尉黃裳入相後除中書舍人

源乾曜因奏事稱旨上悅之驟拔用厯戶部侍郎京兆

尹以至宰相暇日上獨與力士語曰汝知吾拔用乾曜之速乎曰不知也上曰吾以其言語容貌類蕭至忠故用之力士對曰至忠豈不嘗負陛下何念之深上曰至忠晚乃謬耳其初立朝得不為賢相乎上之愛才宥過聞之者莫不感悅

魏知古性方直景雲末為侍中明皇初即位獵于渭川時知古從駕因獻詩以諷手詔褒美賜物五十段後兼知吏部尚書典選事深為稱職所薦用人咸至大官

俛若水為汴州刺史明皇嘗遣中官往淮南採捕鷓鴣  
及諸水禽上疏諫手詔答曰朕先使人取少雜鳥其使  
不識朕意將鳥稍多卿具奏之詞誠忠懇深稱朕意卿  
達識周材義方敬直故輟網罟之重委方面之權果能  
開邪存誠守節彌固骨鯁忠烈遇事無隱言念忠讜深  
用喜慰今賜物四十段用答至言

汝南王璿寧王長子也姿容妍美明皇鍾愛授之音律  
能達其旨每隨遊幸常戴硃絹帽打曲上摘紅槿花一

朵置于帽上簷處二物皆極滑久之方安遂奏舞山香一曲而花不墜樂家云定頭項難在不動搖上大喜賜

金器一廚因曰花奴

原注

資質明媚肌髮光細非人

間人寧王謙謝隨而短斥之上笑曰大哥過慮阿瞞自

是相師

原注上于諸親嘗親稱此號

夫帝王之相且須有英特超逸

之氣不然須有深沈包育之度若花奴但英秀過人悉

無此狀故無猜也而又舉止淹雅當更得公卿間令譽

耳寧王又笑曰若如此臣乃輸之上曰若此一條阿瞞



亦輸大哥矣寧王又謝上笑曰阿瞞贏處多大哥亦不用撓挹衆皆歡賀

開元二十七年八月詔策夫子為文宣王改修殿宇封夫子後為文宣公仍長任本州長史代不絕先時廟夫子在西牖之下武德初并祀周公周公南面故夫子配坐西方貞觀中廢祀周公而夫子西位不改至是移就兩楹南面正位十哲東西侍立又封顏子為兗公閔子為費侯伯牛為鄆侯仲弓為薛侯冉有為徐侯子路為

衛侯宰我為齊侯子貢為黎侯子游為吳侯子夏為魏侯曾參以下並為伯其兩京文宣廟春秋二仲釋奠軒懸之樂八佾之舞牲以太牢州縣以少牢而無樂

學舊六館有國子館太學館四門館書館律館算館國子監都領之每館各有博士助教謂之學官國子監有祭酒司業丞簿謂之監官太學諸生三千員新羅日本諸國皆遣子入朝受業天寶中國學增置廣文館在國學西北隅與安上門相對廊宇粗建會十三年秋霖一

百餘日多有倒塌主司稍稍毀撤將充他用而廣文寄在國子館中尋屬邊戈內擾館宇至今不立

明皇時羽林將劉洪善騎射嘗對御使人于風中擲鵝毛洪連箭射之無有不中

蘇味道初拜相門人問曰方事之殷相公何以變和味道但以手摸牀稜而已時謂摸牀稜宰相

明皇在東都宮中有怪明日召宰相欲西幸裴稷山張曲江諫曰百姓場圃未畢請待冬仲是時李林甫初為

相竊知上意及旅退佯為蹇步上問何故脚疾對曰非疾願獨奏事乃言二京陛下東西宮也將欲駕幸焉用選時假使有妨刈穫獨可蠲免沿路租稅臣請宣示有司即日西幸上大悅自此車駕至長安不復東旬日耀卿九齡俱罷而牛仙客進

自古帝王五運之次凡有二說鄒衍則以五行相勝為義劉向則以五行相生為義漢魏共遵劉說唐承隋代火運向為土德衣服尚黃旗幟尚赤常服赭赤也赭黃

色之多赤者或謂之柘木其義無取高宗時王勃著大  
唐千年歷國家土運當承漢氏火德上自曹魏下至隋  
室南北兩朝咸非一統不得承五運之次勃言迂闊未  
為當時所許天寶中上書言事者多為詭異以冀進用  
有崔昌採勃舊說遂以上聞上納焉下詔以唐承漢自  
隋以前歷代帝王皆屏黜更以周漢為二王後是歲禮  
部試土德惟新賦即其事也及楊國忠秉政自以為隋  
氏之宗乃追貶崔昌并當時議者而復鄴介二公焉

扶風太守房琯申當郡苗損國忠怒以他事推之自是天下有事皆潛申國忠以取可否

楊國忠嘗會親知吏部銓事且欲噓以娛之呼選人名引人于中庭不問資序短小者道州參軍翦者與湖州文學簾中大笑

明皇好神仙往往詔郡國徵奇異之士有張果者則天時聞其名不能致上亟召之乃與使俱來其所為變怪不測有邢和璞者善算術視人投算而究其善惡夭壽

上使算果懵然莫知其甲子又有師夜光者善視鬼後  
召果與坐密令夜光視之夜光奏曰果今安在臣願見  
之而果坐于上前久矣夜光終莫能見上謂力士曰吾  
聞奇士至人外物不足以敗其中試飲以薑汁無苦者  
真奇士也會天寒方甚便以汁進果果遂引飲三卮醺  
然如醉顧侍者曰非佳酒也乃寢頃之引鏡視其齒盡  
焦且黧命左右取鐵如意擊齒盡墮藏之于帶乃于懷  
中出神膏色微紅傅諸墮齒空中復寢久之視鏡齒皆

生粲然潔白上方信其不誣也

明皇時亢旱禁中築龍堂祈雨命少監馮紹正畫西方未畢如覺雲起生梁棟間俄而大雨

羅公遠多秘異之術最善隱形明皇樂隱形之術就公遠勤求而學公遠雖傳不盡其妙上每與公遠同為之則隱没人莫能測若自為之則或遺衣帶或露頭巾脚宮人每知上之所在也百萬錫賚或臨之以死公遠終不盡傳其術上怒命力士裹以油幘置于榨下壓殺而



埋弃之不經旬有中官從蜀使回逢公遠乘驪于路笑而謂曰上之為戲一何虐耶

明皇幸東都秋宵與一行師登天宮寺閣臨眺久之上四顧淒然歎息謂一行曰吾甲子得終無患乎一行曰陛下幸萬里聖祚無疆及西巡至成都前望大橋上乃舉鞭問左右曰是何橋也節度使崔圓躍馬進曰萬里橋上歎曰一行之言今果符合吾無憂矣或曰一行開元中嘗奏上云陛下幸萬里聖祚無疆故天寶中

幸東都庶盈萬數及上幸蜀至萬里橋方悟焉一行和  
尚減度留一物封識命弟子進于上發而視之乃蜀當  
歸也上不諭其意及幸蜀間乃知其深意方歎異之

明皇嘗幸東都天大旱且暑時聖善寺有竺乾僧無畏  
號曰三藏善召龍致雨之術上遣力士疾召無畏請雨  
無畏奏曰今旱數當然爾召龍興烈風雷雨適足暴物  
不可為也上使強之曰人苦暑久矣雖暴風疾雷亦足  
快意無畏辭不獲已遂奉詔有司為陳請雨具而幡幢

像設甚備無畏笑曰斯不足以致雨悉令撤之獨盛一鉢水無畏以小刀于水鉢中攪旋之梵言數百呪水須臾之間有龍其狀如指赤色首瞰水上俄頃没于水鉢中無畏復以刀攪水呪者三有頃白氣自鉢中興如爐烟徑上數尺稍引去講堂外無畏謂力士曰亟去雨至矣力士馳馬去而四顧見白氣疾旋自講堂而西若尺素騰上既而昏霾大風震雷暴雨如瀉力士馳及天津之南風雨亦隨馬而至矣街中大樹多拔力士復奏衣

盡沾濕孟溫禮為河南尹目見其事溫禮子嘗言于李  
栖筠與力士同在先朝吏部員外郎李華撰無畏碑亦  
云前後奉詔禳旱致雨滅火回風昭昭然遍諸耳目也  
明皇紫宸殿櫻桃熟命百官口摘之

明皇命射生官射鮮鹿取血煎鹿腸食之賜安祿山哥  
舒翰

虢國夫人就屋梁懸鹿腸其中結之有宴則解開于梁  
上注酒號洞天聖酒

明皇時以林邑國進白鸚鵡慧利之性特異常者因暇日以金籠飾之示于三相上再三美之時蘇頲初八相每以忠讜厲已因前進日記云鸚鵡能言不離飛鳥臣願陛下深以為志

申王有高麗赤鷹每獵必置之駕前目之為挾雲兒明皇嘗三殿打毬榮王墮馬悶絕黃幡綽奏曰大家年幾不為小聖體又重儻馬力既極以至顛躓天下何望何不看女壻等與諸色人為之如人對食盤口眼俱飽

此為樂耳傍觀大家馳逐忙遽何暇知樂上曰爾言大  
有理後當不復自為也

明皇問黃幡綽是物兒得人憐是物兒者猶何人兒也  
對曰自家兒得人憐時楊妃號安祿山為子肅宗在東  
宮常危懼上俛首久之上又嘗登北樓望渭見一醉人  
臨水卧問左右是何人左右不對幡綽曰是年滿令史  
又問曰爾何以知之對曰更一轉入流上大笑上又與  
諸王會食寧王噴飯直及上前上曰寧哥何故錯喉幡

綽曰此非錯喉是歟帝或曰鄭滁州臚于曲江見令史  
醉卧池岸云更一轉入流又開元中上與內臣作厯日  
令高力士挾大哉置黃幡綽口中曰塞穴吉幡綽遽取  
上前叵羅內靴中走下倒內財吉上歡甚即賜之上好  
擊毬內廐所養馬猶未甚適與幡綽語曰吾欲良馬久  
矣誰能通馬經者幡綽奏臣能知之今丞相悉善馬經  
上曰吾與丞相言政事外悉究其旁學不聞有通馬經  
者爾焉知之幡綽曰臣每日沙堤上見丞相所乘皆良

馬是必能通知上大笑又黃幡綽滑稽不窮嘗為戲上  
悅假以緋衣忽一日佩一兔尾上怪問答曰賜緋垂魚  
袋上謂曰魚袋本朝官入閣合符方佩之不為汝惜竟  
不賜

打球古之蹙鞠也漢書藝文志蹙鞠二十五篇顏注云  
鞠以韋為之實之以物蹙蹙為戲鞠陳力之事故附于  
兵法蹙音千六切鞠音距六切近俗聲訛謂鞠為毬字  
亦從而變焉非古也開元天寶中上數御觀打球為事



能者左縈右拂盤旋宛轉殊有可觀然馬或奔逸時致  
傷斃永泰中蘇門山人劉鋼于鄴下上書于刑部尚書  
薛公云打毬一則損人二則損馬為樂之方甚衆何乘  
茲至危以邀畧刻之歡耶薛公悅其言圖鋼之形置于  
左右命掌記陸長源為贊以美之然打毬乃軍州常戲  
雖不能廢時復為之耳今樂人又有蹋毬之戲作彩畫  
木毬高一二尺女妓登躡毬轉而行縈回去來無不如  
意蓋古蹋鞠之遺事也

拔河古謂之牽鉤襄漢風俗常以正月望日為之相傳  
楚將伐吳以為教戰梁簡文臨雍部禁之而不能絕古  
用篋纜今代以大麻絙長四五十丈兩頭分繫小索數  
百條挂于胸前分兩朋兩向齊挽當大絙之中立大旗  
為界震聲叫噪使相牽引以却者為勝就者為輸名曰  
拔河中宗曾以清明日御梨園毬場命侍臣為拔河之  
戲時七宰相二駙馬為東朋三宰相五將軍為西朋東  
朋貴人多西朋奏勝不平請重定不為改西朋竟輸韋

巨源唐休璟年老隨絙而踣久不能興上大笑令左右  
扶起明皇數御樓設此戲挽者至千餘人喧呼動地蕃  
客庶士觀者莫不震駭進士河東薛勝為拔河賦其詞  
甚美時人競傳之

明皇開元二十四年八月五日御樓設繩技技者先引  
長繩兩端屬地理鹿盧以繫之鹿盧內數丈立柱以起  
繩之直如絃然後技女自繩端攝足而上往來倏忽望  
若飛仙有中路相遇側身而過者有著履而行從容俯

仰者或以畫竿接脰高六尺或跼肩跼頂至三四重既而翻身直倒至繩還往曾無蹉跌皆應嚴鼓之節真可觀也衛士胡嘉隱作繩技賦獻之詞甚宏暢上覽之大悅擢拜金吾衛倉曹參軍自兵寇覆蕩伶官分散外方始有此技軍州宴會時或為之

明皇在禁中欲與姚元之論事時七月十五日苦雨不止泥濘盈尺上令左右以步輦召之

宋開府璟雖耿介不羣亦知音樂尤善羯鼓

原注鼓樂部行可亂

云南山起雲北山起  
兩者是宋開府所為  
嘗與明皇論羯鼓事曰不是青州

石末即須魯山花蘂  
撫小碧上掌下須有朋  
原注去聲肯原注

去聲據此乃漢震第二鼓也  
且顙用石末花磁固是腰

鼓掌下朋肯聲是以手拍鼓  
非羯鼓明矣  
原注第二鼓  
左以杖右以

指開府又曰頭如青山  
峯手如白雨點此即羯鼓之能

事山峯取不動雨點取碎  
急上與開府兼善兩鼓而羯

鼓偏好以其比漢震稍雅  
細焉開府之家悉傳之東都

留守鄭叔則祖母即開府之  
女今尊賢里鄭氏第有小

樓即宋夫人習鼓之所也開府孫沆亦知音貞元中集樂錄三卷德宗覽而善焉又知是開府之孫遂召對賜坐與論音樂又召至宣徽張樂使觀焉曰設有舛乖悉可言之沆沉吟曰容臣與樂官商推條奏上使宣徽使就教坊與樂官參議數日二使奏上樂工多言沆曾不留意不解聲調不審節拍兼有瞶病不可議樂上頗異之久之召對且曰臣年老多病耳實失聽若迨于聲律不致無業上又使作樂曲問其得失承稟舒遲衆工多

笑之沆顧笑者忽忿怒作色奏曰曲雖妙其間有不可  
者上驚問之即指一琵琶云此人大逆戕忍當即去不  
宜在至尊前又指一笙云此人神魂已遊墟墓不可更  
留供奉上大駭令主司潛伺察之既而琵琶工為人訴  
稱六七年前其母自縊不得端由即令按鞠遂伏罪其  
笙者乃憂恐不食旬日而卒上益加知遇面賜章綬累  
召對每令沆察樂樂工悉惴恐不敢正視沆懼罹禍辭  
病而退

李龜年彭年鶴年弟兄三人開元中皆有才學盛名鶴年能歌詞尤妙製渭州彭年善舞龜年善打羯鼓明皇問卿打多少杖對曰臣打五千杖訖上曰汝殊未我打却三豎櫃也後數年又聞打一豎櫃因賜一拂杖杖羯鼓棬後留傳至建中三年任使君又傳一弟子使君令取江陵漆盤底瀉水棬中竟不散以其至平故也又云人聞鼓棬只在調豎慢此棬一調之後經月如初今不如也



天寶中樂章多以邊地為名若涼州甘州伊州之類是  
焉其曲遍繁聲為破後其地盡為西蕃所沒破其兆矣  
上愛幸安祿山呼之為兒常于便殿與楊妃同樂之祿  
山每就坐不拜上而拜楊妃上顧而問之不拜我而拜  
妃子何也祿山奏云外國人不知有父只知有母上笑  
而赦之祿山豐肥大腹上嘗問此腹中何物而大祿山  
尋聲而對腹中但無他物唯赤心而已上以其真而益  
親之

張巡將雷萬春于城上與巡語次被賊伏弩射之中萬春面不動令孤潮疑是木人謀問之知是萬春乃言曰向見雷萬春方知足下軍令矣然其如天理何巡與潮書曰僕誠下材亦天下一男子耳今遇明君聖主疇則屈腰逢豺狼犬羊今須展志云云請足下多服續命之散數加益智之丸無令病入膏肓坐親斧鑕也

張巡之守睢陽明皇已幸蜀賊氛方熾孤城勢蹙人困食竭以紙布煮而食之時以茶汁和之而意自如其謝

金吾將軍表曰想峨眉之碧峯豫遊西蜀追綠耳于懸  
圃保壽南山逆賊祿山戮辱黎獻羶臊闕庭臣被圍四  
十七日凡一千二百餘陣主辱臣死當臣致命之時惡  
稔罪盈是賊滅亡之日忠勇如此激勵將士嘗賦詩曰  
接戰春來苦孤城日漸危合圍倂月暈分守效魚麗屢  
厭黃塵起時將白羽揮裹瘡猶出戰飲血更登陴忠信  
應難敵堅貞諒不移無人報天子心計欲何施又聞笛  
詩曰岌嵒試一臨鐵騎附城陰不辨風塵色安知天地

心營開星月近戰苦陣雲深旦夕更樓上遙聞橫笛吟  
時雍丘令令狐潮以書勸誘不納其書有曰宋七昆季  
衛九諸子昔斷金成契今乃刎頸相圖云云時劉禹錫  
具知宋衛耳剽所得濡毫有遺所冀多聞補其闕也又  
說許遠亦有文其祭纛文為時所稱所謂太一先鋒蚩  
尤後殿蒼龍持弓白虎捧箭又祭城隍文云智井鳩翔  
危堞龍護皆文武雄健士氣不衰真忠烈之士也劉禹  
錫曰此二公天贊其心俾之守死善道向若救至身存

不過是一張僕射耳則張巡許遠之名焉得以光揚于  
萬古哉巡性明達不以簿書介意為真源宰縣有豪華  
南金悉委之故時人語曰南金口明府手及巡聞之不  
以為事

吳道子訪僧不見禮遂于壁上畫一驢其僧房器用無  
不踣踐僧知道子所為謝之乃塗去

王維畫品妙絕工水墨平遠昭國坊庾敬休所居室壁  
有之人有畫樂圖維熟視而笑或問其故維曰此是霓

裳羽衣曲第三疊第一拍好事者集樂工驗之一無差  
舛

王維為大樂丞被人嗾令舞黃獅子坐是出官黃獅子  
者非天子不舞也後輩慎之

或有人報王維云公除右丞王曰吾畏此官屢被人呼  
不解作詩王右丞

王縉多與人作碑誌有送潤筆者誤致王右丞院右丞  
曰大作家在那邊

天寶中天下無事選六宮風流艷態者名花鳥使主飲宴

杭州房琯為鹽官令于縣內鑿池構亭曰房公亭後廢  
案唐書房琯傳琯河南人亦未為鹽官今此疑有誤

驪山華清宮天寶中植松柏徧滿巖谷望之鬱然朝元閣在北嶺之上最為嶄絕次南即長生殿殿東南湯泉凡一十八所第一即御湯周環數丈悉砌白石瑩徹如玉石面皆隱起魚龍花鳥之狀四面石座階級而下中

有雙白石甕連腹異口甕口中復植雙白石蓮泉眼白蓮中涌出注白石之面御湯西南即妃子湯湯稍狹湯側有紅石盆四所刻作菡萏于白石之面餘湯迤邐相屬而下鑿作暗竇走水出東南數十步復立一石表湧出灌注一石盆中後人為也

潞州啟聖宮有明皇敔枕斜書壁處并腰鼓馬槽並存張弘靖為潞州從事皆見之

北邙山玄元觀南有老君廟殿臺高敞下瞰伊洛神仙



塑像皆開元中楊惠之所製世稱奇巧

鄴西鼓山東北有石鼓俗傳石鼓鳴則兵起左思魏都賦云神鉦迢遞于高巒靈響特驚于四表案說文鉦似鈴小者為鐃周禮以金鐃止鼓然則鉦鼓雖同類鉦乃以金為之直謂石鼓為神鉦失其義矣高齊時石鼓鳴未幾而齊滅隋季又鳴無何海內崩亂近天寶末石鼓復鳴俄而幽燕倣擾記傳臨海零陵南康建平天水諸處皆有石鼓其說多同晉武帝時吳郡臨平湖崩出

一石鼓扣之不鳴張華云取蜀郡桐木作魚形擊之則鳴于是聲聞數十里後十六國迭據三百餘年攻戰不息是石鼓之鳴咸非吉徵也

費縣西漏澤者漫數十里每歲時雨降即自浮溢蒲魚之利人實賴焉至白露應節即如掃一夕而乾焉蕭穎士以年代莫詳記載所闕信殊異也

蕭功曹穎士趙員外驊開元中同居興敬里肄業共有一靴久而見東郭之跡趙曰可謂疲于道路矣蕭曰無

乃祿在其中

賀監為禮部侍郎時祁王贈制云惠昭太子補齋挽郎  
賀大納苞苴為豪子相率詬辱之吏遽掩門賀梯牆謂  
曰諸君且散見說寧王亦甚慘澹矣

李白開元中謁宰相封一板上題曰海上釣鰲客李白  
宰相問曰先生臨滄海釣巨鰲以何物為鉤線白曰風  
波逸其情乾坤縱其志以虹蜺為線明月為鉤又曰何  
物為餌白曰以天下無義氣丈夫為餌宰相竦然

宋昌藻考功員外郎之問之子元寶中為淦陽尉刺史  
房琯以其名父之子常接遇會中使至州琯使昌藻郊  
外接候須臾却還云被額房公顧左右何名為額有參  
軍亦名家子斂笏對曰查名詆訶為額房悵然曰道額  
者已可笑識額者更奇近代流俗呼丈夫婦人縱放不  
拘禮度者為查又有百數十種語自相通解謂之查語  
大抵多近猥僻

肅宗在春宮嘗與諸王從明皇詣太清宮有龍見于殿

之東梁上目之問諸王有所見乎皆曰無之問太子太子俛而未對上問頭在何處曰在東上撫之曰真我兒也

禮記祭法累代祭名不聞有戟神節神是知無拜祭之禮也近代受節置于一室朔望必祭之非也凡戟天子二十四諸侯十今之藩鎮即古之諸侯在其地則于衙門及罷守藩閫雖爵位崇高亦不許列于私第上元元年宰相呂諲立戟有司載戟及門諲方慘服乃更吉服

迎而拜之頗為有識者所嗤則知辱命拜賜可也拜輒祭節大乖于禮

海州南有溝水上通淮楚公私漕運之路也寶應中堰破水涸魚商絕行州差東海令李知遠主役脩復堰將成輒壞如此者數四勞費頗多知遠甚以為憂或說梁代築浮山堰頻有壞決乃以鐵數千萬片填積其下堰乃成知遠聞之即依其言而堰果立初堰之將壞也輒聞其下殷如雷聲至是其聲移于上流數里蓋金鐵味

辛辛能害目蛟龍護其目避之而去故堰可成

越僧靈澈得蓮花漏于廬山傳江西觀察使韋丹初惠  
遠以山中不知更漏乃取銅葉制器狀如蓮花置盆水  
之上底孔漏水半之則沈每一晝夜十二沈為行道之  
節冬夏短長雲陰月晦一無所差

嚴武少以強俊知名蜀中坐衙杜甫袒跣登其几案武  
愛其才終不害然與章彝善再入蜀談笑殺之及卒其  
母喜曰而後吾知免為宮婢矣

杜相鴻漸之父名鵬舉父子而似兄弟之名蓋有由也  
鵬舉父嘗夢有所之見一大碑云是宰相碑已作者金  
填其字未作者刊名于柱上因問有杜家兒否曰有任  
自看之記得姓下有鳥偏旁曳脚而忘其字乃名子為  
鵬舉而謂之曰汝不為相世世名鳥旁而曳脚也鵬舉  
生鴻漸而名字且前定矣況官與壽乎

杜亞在淮南競渡採蓮龍舟錦纜之戲費金千萬杜鴻  
漸為都統并副元帥王縉代之鴻漸謂人曰一箇月乞



索兒一萬貫錢蓋計使料多以此詰俸錢都數也

代宗賜郭汾陽九花虬馬子儀陳讓者久之上曰此馬  
高大稱卿儀質不必讓也子儀身長六尺餘九花虬即  
范陽節度使李懷仙所獻額高九寸毛拳如鱗頭頸繫  
鬣如龍每一嘶羣馬聳耳身被九花故以為名

郭汾陽雖度量廓落然而有陶侃之僻動無廢物每收  
書皮之右髹下者以為逐日須至文帖餘悉卷貯每至  
歲終則散與主守吏俾作一年之簿所髹處多不端直

文帖且又繁積吏不暇剪正隨斜曲聯糊一日所用勢  
刀忽折不餘寸許吏乃鋸以應召覺愈于全時漸出新  
意因削木如半鐲勢加于折刃之上使纔露鋒槩其書  
而勢之汾陽嘉其用心曰真郭子儀部吏也

原注言不  
廢折刃也

時人遂效之其製益妙

武后已後王侯妃主京城第宅日加崇麗天寶中御史  
大夫王鉷有罪賜死縣官簿錄鉷太平坊宅數日不能  
遍宅內有自雨亭子簷上飛流四注當夏處之凜若高

秋又有寶鈿井欄不知其價他物稱是安祿山初承寵  
遇敕營甲第壞材之美為京城第一太真妃諸姊妹第  
宅競為宏壯曾不十年皆相次覆滅肅宗時京都第宅  
屢經殘毀代宗即位宰輔及朝士堂權爭修第舍頗為  
煩弊議者以為土木之妖無何皆易其主矣

原注續世  
說明皇為

安祿山起第于親仁坊敕令但窮極壯麗不限財力既  
成其幄帟器皿充牣其中布帖白檀牀二皆長一丈闊  
六尺銀平脫屏風帳一方一丈八尺于廚廐之物皆飾  
以金銀金飯甕一銀淘盆二皆受五斗織銀絲筐及笊  
籬各一他物稱是雖禁中服御之物殆不及也  
上令中使護役常戒之曰彼眼大勿令笑我  
中書令

郭子儀勲伐蓋代所居宅內諸院往來乘車馬僮客于大門出入各不相識詞人梁鋹嘗賦詩曰堂高憑上望宅廣乘車行蓋此之謂郭令曾將出見修宅者謂曰好築此牆勿令不牢築者釋鍤而對曰數十年來京城達官家牆皆是某築祇見人改換牆皆見在郭令聞之愴然遂入奏其事因固請老

張曇為郭汾陽從事家嘗有怪問于術者對曰大禍將至唯休退可免曇不之信及方宴席上見血有尼者聞

之勸其杜門不納賓客屏遊宴曇怒而杖之其後曇言  
語有失汾陽銜之又屢言同列事或獨後見多值方宴  
罷在姬所不可白事必抑門者令通汾陽謂其以武臣  
輕忽己益不平後因謂公去所任吏遂發怒囚之以聞  
竟杖死

李太尉光弼鎮徐北拒賊銜急總諸道兵馬征討之務  
皆自處置倉儲府庫軍州差補一切並委判官張儻儻  
明練庶務應接如流欲見太尉論事太尉輒令判官商

量將校見修禮數如見太尉由是上下清肅東方晏然  
天下皆謂太尉能任人

代宗時百寮立班良久閣門不開魚朝恩忽擁白刃十  
餘人而出曰西蕃頻犯郊圻欲幸河中如何宰臣以下  
不知所對給事劉某出班抗聲曰敕使反也屯兵無數  
何不捍寇而欲脅天子去宗廟仗內震聳朝恩大駭而  
退因此罷議

顏真卿為尚書左丞代宗車駕自陝府還真卿請先謁

五陵孔廟而後還宮宰相元載謂真卿曰公所見雖美其如不合時宜何真卿怒而前曰用舍在相公言者何罪然朝廷事豈堪相公再破除耶載深銜之

代宗欲相李泌元載忌之帝不得已出泌約曰後召當以銀為信忽除銀青光祿大夫泌知載敗已且相矣未幾果然

柳相初名載後改為渾佐江西幕嗜酒好入鄆市不事拘檢時路嗣恭初平五嶺元載奏言嗣恭多取南人金

寶是欲為亂陛下不計試召必不入朝三伏中追詔至  
嗣恭不慮請待秋涼以修覲禮渾入泣諫曰公有功方  
暑而追是為執政所中今少遷延必族滅矣嗣恭懼曰  
為之奈何渾曰健步追還表緘公今日過江宿石頭驛  
乃可從之代宗謂元載曰嗣恭不俟駕行矣載無以對  
元相載用李紆侍郎知制誥元敗欲出官王相縉曰且  
留作誥待發遣諸人盡始出為婺州刺史又曰獨孤侍  
郎求知制誥試見元相元相知其所欲迎謂常州曰知



制詰可難堪心知不我與也乃薦李侍郎紆時楊炎在

閣下忌常州之來元阻之乃二人之力也

元伯和李騰騰弟淮王縉時人謂之四凶劉宗經執經  
兄弟入八元數

李紆侍郎好諧戲又服用華鮮嘗朝回與同列入坊門  
有負販者呵不避李罵云頭錢價奴兵輒衝官長負者  
顧而言曰八錢價措大漫作威風紆樂採異語使僕者

訪八錢之義答只是衣短七耳同列為言紆甚慙

元載擅權多年客有為都盧緣橦歌欲諷其至危之勢覽之泣下

鄭相珣瑜方上堂食王叔文至韋執誼遽起延入閣內珣瑜歎曰可以歸矣遂命駕不終食而出自是罷免

元載敗妻王氏曰某四道節度使女十八年宰相妻今日相公犯罪死即甘心使妾為春婢不如死也主司上聞俄而亦賜死元載于萬年縣佛堂子中謂主者乞一快死也主者曰相公今日受些污泥不怪也乃脫穢襪

塞其口而終

顏真卿集和政公主神道碑詩美下嫁書傳築館貴其中禮載籍稱焉漢魏已還寂寥罕嗣以蕩陵德則維其常皇唐勃興王道丕變平陽起娘子之軍于司竹襄城行匹庶之禮于宋公常樂紂匡復之師于武后皆前古之所未有其或生知禮樂周旋法度躬行婦道以懋大倫克順天經光昭懿烈名言之所莫究書記之所未聞聚衆美于一身鄰太虛而獨立者其唯和政公主乎公

主姓李氏隴西成紀人皇唐玄宗大聖大明孝皇帝之  
孫肅宗文明武德大聖大宣孝皇帝之第二女帝女之  
崇于斯為盛今天子之同母曰章敬皇太后后之在襁  
褓也后父贈太尉吳君曰令珪嘗游宦蜀中使道士勾  
規占之規驚起曰此女貴不可言是生二子男為人君  
女為公主嫁于柳氏其後竟配肅宗生今上及公主神  
所命也厥惟舊哉公主三歲而孤即能孺慕育于儲妃  
韋氏純孝過人幼而聰惠長而韶敏穠華秀整令德芬

馨婉嫺發于天姿肅雍形于鑒寐奉今上以悌達事章  
妃如所生繇是特為肅宗之所賞愛至若左右圖史開  
示佛經金石絲竹之音績畫工巧之事耳目之所聞見  
心靈之所領畧莫不一覽懸解終身不忘天寶九載春  
三月既望封和政公主降于河東柳潭既笄之三載矣  
潭周太保敏之五代孫皇唐蘄州刺史懷素之曾孫贈  
秘書監岑之第四子衣冠地胄輝映當朝初以美秀承  
家中以名聲華國道勝而貴能下善謙尊而休有烈光

士林偉之解褐左內率府曹曹轉潁王府戶曹陳留郡  
司功參軍以人門第一選尚公主拜太子洗馬亦既好  
合雅相敬貴雖柳侯秉彛有度能降帝女之心而公主  
率履由衷每抗古人之節故宗族胥睦不獨親其親先  
後大同莫敢私其子竭力供侍不務華采服無金翠之  
飾居有冰雪之容每至朔月六參朝天旅進嫣然班叙  
之內迴出神仙之表亦非希企之所及也洎凶羯亂常  
潼關不守玄宗幸蜀妃后駭奔姊曰寧國公主孀嫠屏

居誰或訃告乃棄其三子取其夫之乘以乘之柳侯徒  
行公主愧馬下而同趨者日且百里每臻坎險必先濟  
寧國而後從之柳侯辭公主曰我若先涉脫有危急不  
能俱全則棄我姊矣柳侯感歎躬負薪之役公主怡然  
親饋餼之事伯姁華陰楊氏太真妃之姊也貴倖前朝  
勢傾天下公主交無諂黷思未綢繆楊且云亡以孤見  
託馬嵬之役無唯類焉感其一言悉力營贍男登服冕  
之位女獲乘龍之匹出入存恤過于己子雖其密親罔

或能辨柳之親昵伯仲姑姊隱覲將迎唯恐不至糾逃  
疏屬撫循惇嫠繇內及外終始如一孤窮滿目榮悴殊  
倫居薄推厚未嘗懈倦衣服飲食等無有差互或未周  
嬰孩罔及每至伏臘祔祠丞嘗必具禮衣花釵之飾以  
躬中饋堂室之奠式燕孫謀豈無婢使姿性純儉不以  
迄成先聖休之寶書清問秋八月玄宗至蜀仍舊邑而  
冊公主以潭為駙馬都尉銀青光祿大夫太僕卿屬狂  
將興禍稱兵向闕玄宗親御閭闔臨視誅討駙馬率領



家豎折衝張義童等闔于門中公主及寧國穀弓迭進  
駙馬乘勝突刃所向無前斬馘擒生殆逾五十節使時  
宰具以表聞玄宗自繫誥示先帝懇讓莫當策勲遂寢  
今上之為元帥也躬擐甲冑率先將卒舉兩京若拾遺  
摧兇寇如振槁勞旋方及帑藏其空公主質遷有無億  
則屢中數逾千萬悉畀縣官論者難之肅宗彌留衆皆  
迭侍主獨瞻依不去于旁帝有間盡而謂之曰汝之純  
孝乃能至是遂賚莊一區帝愛季女曰寶貞公主因奏

曰八妹未有請以賜之泣而諫焉哀動左右西陵遷窆  
上戒主曰凡厥親身之物必誠必信勿之悔焉主罄家  
有無以邑入千萬潛充經費上深感歎焉上既宅亮陰  
未忍臨政人之疾苦事之得失豈嘗私謁動必以聞上  
敬異之朝廷賴焉廣德元年冬上既東幸主志期扈蹕  
迴兵充斥咫尺不通因至荆南慰薦諸將方隅載謐職  
貢以修主有力馬上之在陝憂主乏匱乃命中使屢敕  
節度及轉運使隨主所須務令肅給主以國用罄空退

而歎曰吾方竭家財以資戰士其能饕饕首冒國經唯  
請名香數斤施于佛寺為上祈福而已王公戚屬相携  
而至者藍縷臙囊襁負鱗次竭其資斧親自瞻恤聚而  
泣之悲感行路初次商於頓于傳置羣盜蝟起奄及驛  
亭呼而擄之曉以禍福一言革面願比家奴之死靡他  
至今猶在緬惟罔極無所寘哀從母薛氏遺孤四人分  
宅居之皆俾成立萊萃兄弟盡列通班二女有行克配  
良士主之慈忠悉皆若是親臨稼穡躬儉節用不憚煩

縉雅好組紉駙馬裳衣必親裁紩爰及子女罔衣綺紈  
綻新皆成主手每加訓誨憊廸檢押廣德二年春二月  
歸于上都諸主高會議際夫黨覲其親族多曠周旋咸  
以為時經百罹粗畧可也主抗詞曰女之移天遂成他  
族怙貴長傲何以律人上方理定聞必不悅諸主蹶然  
競崇討習禮之降殺親之薄厚翕然一變職主之由夏  
六月才生魄屬邊候不謹烽及京師城中震驚圍視無  
色主既彌月體未甚安曰事亟矣其入言之駙馬請問

主曰吾業已行矣駙馬獨無兄乎因乘檐子直至寢殿  
乃悉索闕遺備陳利病以奏之上欣然嘉納所言未究  
傍或負來因爾退歸遲明誕育展轉怙悵不能彌忘時  
屬炎暍熱病有加聖情憂軫起坐失次天醫內官相繼  
旁午彼蒼不惠以其月二十有五日辛卯薨于常樂坊  
之私第春秋三十有六嗚呼皇上友愛天深痛毒兼至  
嗟然一叫聲淚俱咽哀動木石豈伊人倫漣漣孔懷如  
失于臂曰予此妹國之鴻寶方期同樂云如何殂嗟哉

天實為之胡寧忍予乃輟朝三日命京兆尹監護喪事  
一以官供務從優厚柳侯搗膺永悼氣索神傷心苦而  
忽然忘生泣盡而繼之以血況乎五男三女或齕或孩  
呼阿母而哭無常聲籲昊天而仁覆永絕哺以滋旨嗌  
而莫就其為酷痛曷愈子斯以是思哀哀可知矣自朝  
及野知與不知聞之失聲罔不震悼棧有青牛素服輓  
輓主之薨也踣地哀鳴仰天屑淚三日不秣畜猶若是  
臣僕可知主之將薨馭馬先殞捐館之夕游神別墅乘

之周麾徧勞慈遺俾屏不逮田客兼從數騎久已云亡  
衆皆驚起髣髴猶見雖所憑則厚而精氣何多主于耐  
馬大義敦肅不恃倪天之貴每極家人之禮耐馬雅性  
夷簡恬于名利願究衛生之經庶臻久視之道主志深  
婉順始慕真宗故于他時並受法籙嘗謂之曰易崇積  
善詩貴起予不以忠孝數事迭相告勗者則心有慊焉  
率而行之曷嘗廢墜又以為死生恒理先後之間若幸  
啟手足必當遜我以道服瘞我于支提往來行言時見

存恤則所懷足矣子若不諱我若此身未亡酒掃塋壠  
出入窻窰奉君周旋噫嘻于斯之時以為謔浪豈悟今  
者皆符昔言有司奉詔將厚其禮駙馬疏陳皆蒙允許  
粵以秋八月十九日甲申其男試太常少卿賜紫金魚  
袋晟鴻臚少卿暈試秘書丞賜紫金魚袋杲試殿中丞  
昱及三女等虔寔公主于萬年縣義豐之銅人原從理  
命也嗚呼風詠襲裳史稱彤管纖微之善載籍猶稱況  
乎七葉帝女分形歸妹貴能逮下忠以導君躬德言容



功之美服女師母儀之訓訂之縣古孰與我京昔馬遷  
著記謂之實錄有道見述亦云無愧某學于舊史少識  
前載厯考往代釐降之盛未有如公主者焉雖壺則家  
風每挹如賓之敬而勤崇垂懿敢忘傳信之辭銘曰穠  
矣公主玄元之緒聖皇之孫肅宗之女今上之妹生人  
之矩德言容功義仁孝忠溫良恭儉敬讓弘通率履弗  
越高明有融下嫁于柳猗那自久金石著盟瑟瑟斯友  
家道以正人倫斯厚鳳凰于飛梧桐是依雖雖啗啗福

祿攸歸和樂既孺德音莫違麟之趾定振振子姓方紹  
母師奄摧邦令一人痛毒九有悲詠詔葬于何銅人之  
阿丈提鬱起宰樹誰過空餘好合來往滂沱

永泰中大理評事孫廣著嘯旨一篇云其氣激于喉中  
而濁謂之言激于舌端而清謂之嘯言之濁可以通人  
事達情性嘯之清可以感鬼神致不死故太上老君授  
南極真人真人授廣成子廣成子授風后風后授務光  
務光授舜舜演之為琴以授禹自後或廢或續有晉大

行仙君孫公得之以得道無所授阮嗣宗所得少分其  
後不復聞矣按高氏緯畧嘯有十五章一曰權輿二曰  
流雲三曰深溪虎四曰高柳蟬五曰空林鬼六曰巫峽  
猿七曰下鴻鵠八曰古木鳶九曰龍吟十曰動地十一  
曰蘇門孫登隱蘇門山所作也十二曰劉公命鬼仙人  
劉根所作也十三曰阮氏逸韻阮籍所作也十四曰正  
章十五曰深遠極大非常聲也畢盡五音之極而大道  
備矣廣云其事出道書余按人有所思則長嘯故樂則

詠歌憂則嗟嘆思則嘯吟詩云有女叱離條其嘯矣顏  
延之五君詠云長嘯若懷人皆是也廣所云深溪虎古  
木驚狀其聲氣可知矣若太上老君相次傳授舜演為  
琴崇飾過甚余不敢聞也按詩箋云嘯蹙口出聲也成  
公綏嘯賦云動唇有曲發口成音而今之嘯者開口卷  
舌畧無蹙舌之法孫氏云激于舌非動唇之謂也天寶  
末峨眉山道士姓陳來遊京師善長嘯能作鼓霹靂之  
引初則聲發調暢稍加散越須臾穹窿砰磕寫雷鼓之

音忽復震駭聲如霹靂聞者莫不傾慄

至德二年敕天下州縣重定酤酒隨月納稅建中二年  
更加青苗大歷初稅每十文三年加五文敕以御史大  
夫充使其後割歸度支使

開元已前有事于外則命使臣否則止罷自置八節度  
十採訪始有坐而為使者其後名號益廣大抵生于置  
兵盛于興利普于銜命于是為使則重為官則輕故天  
下佩印有至四十者大歷中請俸有至百萬者在朝有

太清宮太微宮度支鹽鐵轉運知縣宮苑閑廐左右巡  
分案監察館驛監倉監庫左右銜外任則節度觀察諸  
軍押蕃防禦團練經畧鎮遏招討權鹽水陸運營田給  
納監牧長春宮有因時而置者則大禮禮儀禮會刪定  
三司黜陟巡撫宣慰推復選補會盟冊立弔祭供軍糧  
料和糴此其大畧經置而廢者不錄宦官內外悉謂之  
使舊為權臣所綰州縣所理後屬中人者有之

大厯中刑部郎中程皓家在相州宅前有小池有人造

矧于池內淬之池魚皆死余家井中有魚數十頭因有  
急家人以藥臼投之信宿魚皆浮出知魚亦畏鐵焉  
大厯末北方有白虹夜見東西屬地封演曰凡虹見皆  
當日之衝朝見則在西常與日相近不差分毫今此虹  
見之時日在癸則虹見當在丙常時虹影穹崇舉目而  
望今虹在北又可平視知日在北方去茲遠矣畧計此  
當在斗極之北斗極天中也故北方可得而見而日更  
在虹之北又甚遼闊故北方不得而見之

苗夫人其父太師也舅張河東也夫延賞也子弘靖也  
壻韋太尉也近代衣冠婦人之貴無如苗氏者

唐語林卷五



欽定四庫全書

子部

唐語林卷六

詳校官侍講學士<sub>臣</sub>平恕

侍讀<sub>臣</sub>孫球覆勘

總校官候補中允<sub>臣</sub>王燕緒

校對官學錄<sub>臣</sub>謝登雋

謄錄監生<sub>臣</sub>汪國均

欽定四庫全書

唐語林卷六

宋 王彥撰

補遺

起德宗  
至文宗

德宗降誕日內殿三教講論以僧鑒虛對常湍年以許  
孟容對趙需以僧覃延對道士郗惟素諸人皆談畢鑒  
虛曰諸奏事云玄元皇帝天下之聖人文宣王古今之  
聖人釋迦如來西方之聖人今皇帝陛下是南瞻部洲

之聖人臣請講御製賜新羅銘講罷德宗有喜色

德宗降誕日三教講論儒者第一趙儒第二許孟客第三韋渠年與僧輩延嘲謔因此承恩也渠年薦一崔阡拜諭德為侍書於東宮東宮順宗也阡觸事面牆對東宮曰臣山野人不識朝典見陛下合稱臣否東宮曰卿是宮寮自合知也

李丞相泌謂德宗曰肅宗師臣豈不呼陛下為憲耶

案

字字書無之疑誤

聖顏不悅泌曰陛下天寶元年生向外言改

年之由或以弘農得寶此乃謬也以陛下此年降誕故明皇帝以天降之寶因改年號為天寶也聖顏然得大悅又韋渠牟曾為道士及僧德宗問卿從道門本師復是誰渠牟曰臣師李仙師仙師師張果老先生肅宗皇帝師李仙師為仙帝臣道合為陛下師由跡微官卑故不足為陛下師渠牟亦效李相泌之對也

趙涓為監察御史時禁中失火火發處與東宮相近代宗疑之涓為巡使俾令即訊涓因厯墻園按據迹狀乃

上直中官之火所致也既奏代宗稱賞德宗時在東宮常感涓究理詳明及刺之州年考既深與觀察使韓滉不相得滉奏免涓官得宗見名謂宰相曰豈非永泰初御史趙涓乎對曰然即日拜尚書左丞

司徒鄭貞公每在方鎮公之陳設器用無不正備宴犒未嘗刻簿其平居奉身過於儉素中外婚嫁甚多禮物皆經處畫公與其宗叔太子太傅綱居昭國防太傅第在南出自南祖司徒第在北出自北祖時人謂之南鄭

相比鄭相司徒堂兄文獻公前後相德宗亦謂之大鄭  
相小鄭相焉

德宗西幸馬一號神智驄一號如意驄

王承昇有妹國色德宗納之不戀宮色德宗曰窮相女  
子乃出之敕其母兄不得嫁進士朝官任配軍將親情  
後適元士會以流落終

顏魯公嘗得方士名藥服之雖老氣力壯健如年三四  
十人至奉使李希烈春秋七十五矣臨行告人曰吾之

死固為賊所殺必矣且元載所得藥方亦與吾同但載貪甚等是死而載不如吾吾得死於忠耶於是命取席固圍其身直立一躍而出又立兩藤倚子相背以兩手掘其倚處懸足點空不至地三二寸數千百下又手按牀東南隅跳至西北者亦不啻五六乃曰既如此疾焉得死吾耶異日幸得歸骨來秦吾姪女為裴郎妻者

原註

即即魯公之親表姪

此女最仁孝及吾小青衣剪綵者頗善承事

是時汝必與二人同啓吾棺知有異於常人之死爾如

穆護

原注穆護即魯公男碩之小名也

天性之道難名至此至秦州責

希烈反逆無狀竟不取以面目相見亦不敢以兵刃相  
恐潛命獻食者送空器而已翌日賊令官翌來縊之魯  
公曰老夫受之及服藥皆有所得若斷吭道家所忌今  
贈使人一黃金及吾死之後但割吾他支節為吾吭血  
以給之死無所恨耳曰使人悟慧如此不事明天子反  
事逆賊何所圖也官翌從其言至明年希烈死蔡使陳  
仙奇奉魯公喪歸京猶子顏峴實從柳常侍與裴氏女



及剪綵同迎喪於鎮國仁寺咸遵還旨啓棺如生

原注  
柳製

魯公挽歌嗣曰投角  
終不恨歸喪遂如生

顏真卿為平原太守立三碑皆自撰書其一立於郡門  
內紀同時臺省擢授諸郡者十餘人其一立於郭門之  
西紀顏氏曹魏時顏裴高齊顏之推具為平原太守至  
真卿凡三典茲郡其一是東方朔廟碑鐫刻既畢屬祿  
山亂未之立也及真卿南渡蕃寇陷陷州人埋匿此碑  
河朔克平別駕其子晁好事者也掘碑使立於廟所其

三碑求得舊文買石鐫勒樹之郡門時顏任撫州子晁拓三碑木寄之顏經艱難對之愴然曰碑者往年一時之事何期大賢再為修立非所望也即日專使送書至平原致謝子晁後至官刺史兼御史大夫

天寶初有范氏尼者知人休咎顏魯公妻黨之親也魯公尉醴泉日詣范問曰某欲就制科試乞師姨一言范尼曰顏即事必放自後一兩月朝拜但半月內慎勿與國外人爭競恐有譴謫魯公曰官身盡五品身著緋衫

帶銀魚兒子得補齋郎其望滿矣范仲指座上紫絲布食單曰顏郎衫色如此其功業名節皆稱是過七十已後不須若魯公再三窮詰之范曰顏郎聰明過人問事不必到底逾日大酺魯公制科高第授長安尉遷監察御史因押班責武班中喧嘩者命小吏祿奏次即哥舒翰也翰時有新破石壁城功泣訴明皇坐魯公輕侮大臣貶蒲州掾及魯公為太子太傅使蔡歎曰范師之言吾命懸於賊庭必矣

建中初開播為給事中尉以諸司甲庫皆事胥史所掌  
為弊頗久因播議用士人知之為之掌庫

興元中有知馬者曰李幼清暇曰常取適于馬肆有致  
悍馬于肆者結鑠交結其頭二力士以未來支者頤三  
四輩執撾而從之馬氣色如將噬有不可馭之狀幼清  
逼而察之訊于主者且曰馬之惡無不具之將貨焉唯  
其所酬耳幼清以二萬易之馬主尚慙其多既而聚觀  
者數百輩訝幼清之決也幼清曰此馬氣色駿異之骨

德度非凡馬是必主者不知馬俾雜駕輦槽棧陷敗狼藉刷滌不時芻秣不適蹄日蹂奮蹇破唐突志性之塞終不可久無所顧賴發而為狂躁則無不為也既晡觀者少間乃別市一新絡頭幼清自持徐徐而前語之曰爾材性不為人知吾為汝易是鑠結雜穢之物馬弭耳引首幼清自負其知乃清沐剪飾別其皂棧異其芻秣數日而神氣一小變踰必而大變志性如君子步聚如俊又嘶如龍顧如鳳乃天下之駿乘也

嗣曹王臯有巧思精於器用為荊州節度使有羈旅士  
持二羯鼓捲謁臯臯見捲曰此至寶也指銅勺之狀賓  
佐皆莫曉臯曰諸公未必信命取食拌自選其極平者  
遂量重二捲于拌心油注捲中滿不浸漏其吻合無隙  
臯曰此必開元中供御捲不然無以至此問其所自客  
曰某先人在京中得于高力士家之衆服其識賓府潛  
問客直有幾何答曰不過二百五十及遺財帛器物其  
直果稱焉張敦素夷堅錄云宗正卿李琬善羯鼓有士

予以雙鐵棧賣之還二十緡其人快快琬復資之客有怪其厚價琬乃取一盤底至平者以二棧重重安盤中灌水其中曾無泄漏琬曰至精所至其貴在茲某案南卓郎中羯鼓錄但云李卿妙于羯鼓不言有得棧事則敦素之言非耶

宋沆為太常丞每言諸懸中磬亡墜至多補之者又乖律呂忽因於先宅佛寺待漏聞塔上之聲傾聽久之朝廻得止寺舍問寺主僧曰上人塔上鐸皆知所自乎曰

不能知之曰某間有一是近制某請一人循鈴索厯扣以辨之可乎初僧難後許乃扣而辨焉寺衆即言往往無風自搖洋洋有聲非此也耶沆曰是也必因嗣祭考本懸鍾而應也因求摘取而觀之曰此姑洗編鐘耳且請獨綴于僧庭歸太常令樂人與僧同臨之約其時彼扣本樂由此果應之遂購而獲又曾送客至通化門逢度支運乘駐馬俄頃忽草草揖客別乃隨乘至左右門認一鈴亦言編鐘也他人但見鎔鑄獨工不與衆者埒



金史卷六  
莫知其餘及配懸音形皆合其度異耳

貞元中張茂宗尚義章公主贈鄭公主諡之為貞穆有  
司擇日策論唐已來公主即有追封者未有加諸者公  
主追諡自此始也

貞元十二年六月乙丑始以竇文瑒為左神策護中尉  
霍仙鳴為右神策護中尉某月又以張尚進為神武中  
護軍左右辟仗使之如也

貞元中賈全為杭州于西湖造亭為賈公未五六十

年廢

案卷五一條杭州房琯為監官令于縣內鑿池溝亭曰房公亭後廢全與此條相類當是編輯者以

賈全事誤作房琯而王謹采據各書

遂兩者之今無可參校亦姑並存

貞元中郎史年為權鹽使有表生二人自鄜水來謁其母仍使子齋一青鹽枕以奉年年封枕付庫杖殺二表生

德宗非時召拜吳湊為京兆尹便令赴上疾驅請客至府已列筵矣或問何速吏曰兩市日有禮席舉鎗釜而取之故三五百人之饌常可立辦

韓臯自中書舍人除御史丞西省故事閣老改官則詞頭次送以舍人是時呂渭草敕臯憂恐問曰僕有何命渭不告臯却之曰與公俱佐降乃告之臯又欲訴宰相渭執之奪其象笏恟恟至午後三刻乃上

德宗復京師賜勲臣第宅妓樂李令為首渾侍中次之馬司徒面斥李懷光德宗正色曰惟卿不合斥人惶恐而退李令聞之請全軍自備資糧以討凶逆因此李馬不平李令常為制將至西川與張延賞有隙及延賞作

相二勲臣在朝德宗常令韓晉公和解宴樂則宰臣盡  
在而太常教坊音樂皆至恩賜酒饌相望於路張李二  
家日出無音樂之聲金吾必奏俄頃有中使來問大臣  
今日何不舉樂

韓晉公間德宗在奉天以夾練囊絨茶末使步以進又  
發軍食常自負米一石登舟大將以下皆運一日之中  
積載數萬斛後大修石頭五城召補迎駕子弟時論疑  
之張鳳翔鑑間難盡出所有衣服並其家鈿釵枕鏡列

於小廳將獻行在俄頃後阮火起妻女出而鑑從判官  
田承之得出匿村舍中數日稍定會鈴家知之走告軍  
中計議迎鑑遂遇害

德宗幸奉天朱泚自率兵至于城下有西湖寺僧陷在  
賊中僧甚機巧教泚造攻城雲梯其高九十餘尺上施  
板屋樓櫓可以瞰城中渾中令李司徒奏曰賊鋒矢既  
盛雲梯又壯縱之恐不能禦及其尚遠請以銳兵挫之  
遂出師五千束縲居後約戰酣而燎風逆不能舉火二

公酌酒祝之詞氣慷慨士百其勇須臾風回舉火縱之鼓譟而進梯遂蕩盡德宗御城樓以觀衆呼萬歲

朱泚陷京師天子幸盤屋梁洋喬琳侍從至南谷口奏德宗曰臣為陛下仙遊寺出家以禳災上甚喜惜其去不能阻及聽之至仙遊不踰月入京師持盃乞匄人有布施者琳獻之曰尚有常施後反為泚作吏部尚書知選事有選人通官云不之便又戲云只公此選得穩便否泚敗上親點送人簿至琳上曰與卿平背分深盤屋

相舍甚欲赦卿其如法何持盃判官言選猶在耳當時戲談時朕於爾時惶惶也左右喝琳付法

李相國揆以進士調集在京師聞宣平坊王生善筮往問之王每以鏹五百決一局而來者甚多自辰及酉有未筮而空返者揆持一繯晨往生為之開卦曰君非文字之選乎當河道之一尉揆負才與門籍不宜為此頗忿而去生曰君無怏怏自此數月當拜左拾遺前事固不準也揆怒未解生曰若事驗後一過我揆以書判不

中第補汴州陳留尉以生之生有徵復詣之生於几下  
取一卷書以授之曰君除拾遺可視此書不爾當有大  
咎得而藏之既至陳留時採訪使倪若水以揆才品族  
望留假府職會郡有事須上請擇與中朝通者無如揆  
乃請行關中郡府上書姓李皆先謁宗正璆適遇上尊  
號璆請為表三通以次上之明皇召璆曰百官上表無  
如卿者璆頓首謝曰此非臣所為是臣從子陳留尉揆  
所為乃召揆時揆寓於遠房盧氏姑之舍子弟聞召且



未敢出及知上意欲以推澤遂出既見命宰臣試文詞  
時陳黃門為題目三篇其一曰紫絲盛露囊賦二曰荅  
吐蕃書三曰代南越獻白孔雀表既封請曰前二首無  
所恨後一首或有所疑願得詳之乃許塗八字旁注翌  
日授左拾遺旬餘乃發王生書三篇皆在其中而塗注  
者亦如之遽往宣平里訪王生不復見矣

德宗時楊炎盧杞為宰相皆奸邪用事樹立朋黨以至  
天子播遷宗社幾覆德宗懲輔相之失自是除拜命令

不專委於中書凡奏擬用人十阻其七貞元以後宰相備位而已每擇官再三審覆事多中輟貞元三年八月  
中書省無舍人每有詔策宰相追他官為之及兵部侍郎陸贄知政事以上艱於選用乃上疏論之

盧杞除虢州刺史有奏虢州有官豬數千常為人患德宗曰可移沙苑杞對曰同州豈非陛下百姓為患一也豬非無用之物與人食之為便德宗嘆曰卿里虢州而憂他郡百姓宰相才也由是有意於相

裴延齡恃恩輕躁班列懼之惟顧少連不避延齡嘗畫一鵬羣鳥噪之以獻上知衆怒益信之而竟不大用

相國竇參之敗給事中竇申配流德宗曰吾間申欲至人家則鵲喜遂賜死參貞元壬申三月居光福里第月夜間步中庭有寵妾上清者曰今欲啓事即須到堂前方敢言之亟上堂上清曰庭樹上有人請為避之竇公曰陸贄久欲傾奪吾權位有人在庭樹上吾死之將至具奏與不奏皆受禍必密死於道路安之流中不可多

得身死家破汝定為官婢聖君如顧問當為我辭上清  
泣曰誠如是生死以之竇公下階大呼樹上人應是陸  
贄使來能全老夫性命敢不厚報其人遂下乃衣縗簾  
者曰家有大喪貧甚不辦葬禮伏知相公推心濟物所  
以卜夜而來參曰某罄所有當封絹千匹而已方具修  
廟家資今以為贈其人曰請左右齎所賜絹擲於牆外  
某於街中候之參依其言翌日執金吾先奏之德宗怒  
曰卿交通節將畜養俠刺位崇台鼎更欲何求參頓首

曰臣起自布衣小才官已至貴皆陛下獎援實不因人  
今不幸至此乃仇人所為爾中使下殿宣卿且歸賜第  
候進止越月貶郴州別駕會宣武節度劉士寧通好於  
郴州觀察使上聞德宗曰交通節度將信而有徵乃流  
參於驪州以籍其家未達流所詔賜自盡上清果隸掖  
庭後數年善應對能煎茶在帝左右德宗曰宮內人數  
不少汝最了事從何得至此上清對曰妾本故宰相竇  
參女奴竇參家破填宮得侍上德宗曰竇某罪不止養

使刺亦甚有贓汚前納官銀器至多上清流泣而言曰  
竇參自御史丞歷度支戶部鹽鐵三使至宰相首尾六  
年月入數十萬前後非時賞賜甚厚迺者柳州送所納  
官祿物皆是恩賜當部錄曰妾在柳州親見州縣希贄  
意旨盡刮去所進銀器上刻藩鎮官銜姓名誣為贓物  
乞陛下驗之於是宣索竇參沒官銀器覆其刻處皆如  
上清言德宗又問蓄養俠刺事上清曰本實無此悉是  
陸贄陷害使人為之德宗怒陸曰者獠奴我脫却伊綠

衫便與紫著又常喚伊作陸九我任使竇參方稱意次  
須教我枉殺却及至權入伊手其為軟弱甚於泥團乃  
下詔雪參時裴延齡探知陸贄恩衰恣行媒孽竟受譴  
不迴後上清賜敕度為道士終嫁為金忠義妻世以陸  
贄門生多位顯者不敢說故此事絕無人知

裴佖常語有姑夫為官朝有望佖至其居謁之會退朝  
浩歎曰崔昭何人衆口稱美此必行貨賂者也如此安  
得不亂言未訖門者報曰壽州崔使君候姑夫怒目門

者將鞭之良久束帶強出須臾命茶甚急又命饌又令秣馬飯僕佶曰前何倨後何恭及入門有喜色揖佶而曰憇外舍未下階出懷中一紙乃贈官絇千匹

李司徒勉為開封縣尉特善捕賊時有不良試公之寬猛乃潛納人賄俾公知之公召告吏卒曰有納其賄者我已知之任公等自陳首不得過三日過則舁櫬相見其納賄不良故逾限而忻然自齎其櫬公令取石灰棘刺置於中令不良入命取釘釘之送汴河訖乃請見廉



使廉使廉賞久之後公為大良節度使人問公曰今有官人如此如何待之公曰即打腿

盧舍人羣盧給事弘正相友善羣清瘦古淡未嘗言朝市弘正魁梧富貴未嘗言山水羣曰飲高臥制詔多就宅草之弘正未嘗在假告有賓客皆就省相見一日雪中羣在假弘正將欲入省因過羣羣方道服於南垣茅亭望山雪促命延入羣曰盧六盧六曾莫我何也弘正曰月限向滿家食相仍且詣宰府以求外任羣曰奔

走權門所不忍視臘酒一壺能共醉否弘正曰切欲詣  
省羣又呼侍兒曰盧六待去早來藥糜宜勻越器中我  
與給事公對食弘正曰不可今旦犯冷已買血蒜羹餐  
矣

劉太真為陳少游行狀比之齊桓晉文時議喧騰後坐  
貢院用情造責前事貶信州刺史

韋太守之在西川凡軍民將有婚嫁則以熟綿衣給其  
夫以銀泥衣給其妻又各給錢一萬死葬稱是精訓練

待之如敬客極其聚斂軍府浸盛而民困矣晚年終至  
劉闢之亂天下譏之

劉闢初有心絕人自外至輒闢而吞之同府崔佐特碩  
大闢據地而吞背列血流獨盧文若至不吞故後自惑  
國子司業韋聿者聿之兄也朝中以為戲弄或言九宮  
休咎聿曰我家白方常在西南二十年矣權相為舍人  
以門望自處常戲同僚曰未嘗以科第為資鄭雲逵謔  
曰更有一人盧問誰答曰韋聿滿座皆笑

汴州相國寺言佛像有流汗劉元佐遽命駕自持金帛以施日中其妻亦至明日復起齋場由是將吏商賈奔走道路如恐不及因令官為簿書以籍所入十日乃閉寺門曰汗止矣所得益鉅萬計以贍軍

崔膺性狂張建封愛其文引為客隨建封行營夜中大叫驚軍軍士皆怒欲食其肉建封藏之明日置宴監軍曰某與尚書令彼此不得相達建封曰唯監軍曰某有請請崔膺建封曰如約遂巡建封又曰某有請亦請崔

膺坐中皆笑乃得免

李實為司農卿督責官租蕭祐居喪輸不及期實怒召至租車亦至得不罪會有賜與當謝狀秉筆者有故未至實乃曰召衣齊衰者祐至立為草狀實大喜延英面薦德宗令聞喪期屈指以待及除服日以處士拜拾遺祐有文章喜書畫好彈琴其技擢乃爾然耳

鄭雲遠與王彥鄰嘗有求之醫誤造雲遠診曰曰熱風客又請藥方雲遠曰藥方即不如東家王供奉客驚而

去自是京城目乖宜者為熱風

王仲舒為郎中與馬逢友善每責逢曰貧不堪之何不  
求碑誌相求逢笑曰適見人家走馬呼醫立可得也

許尚書孟容與宋濟為布衣交及許知舉宋不中第放  
榜後許自愧累請人致意兼令門生就見宋乃謁許深  
謝之因置酒酣乃曰某今年為國家取卿相時有姚嗣  
及第數日卒乃起慰許曰邦國不幸姚公令薨謝

鄭昉性通脫與諸甥姓談笑無間會被飄瓦所擊頭血

淋漓兩玉簪俱碎家人惶遽來視外甥王某在後至曰  
二十舅今日頭壁俱碎呖大叫曰我不痛裏傷命酒酣  
飲盡欲

顧况從辟與府公相失揖出幕况曰某夢口與鼻爭高  
下口曰我談今古是非爾何能居我上鼻曰飲食非我  
不能辨眼謂鼻曰我近鑒豪端遠察天際惟我當先又  
謂眉曰爾有何功居我上眉曰我雖無用亦如世有賓  
客何容主人無節不成之儀若無眉成何面目府悟

其譏待之如初又舊說顧况與韋夏卿飲酒時金氣已  
殘夏卿請席徵秋後意曰寒蟬鳴或曰班姬扇既而况  
云馬尾衆哂之曰此非在秋後乎

郎中故事吏部郎中二廳先南曹次廢置刑部分兩賦  
其制尚矣舊部吏部為南省舍人考功曹吏為振行比  
部得廊下食以飯從者號曰比盤二十四曹呼左右司  
為都公省中語曰後行祠屯不博中行都門中行刑部  
不博前行駕庫故事度支郎中判入員外判出侍郎總



統押案而已乾元已後始為使額郎官當直發敕為重  
水部員外劉約直宿會河內犯凶配流嶺表夜發敕符  
直宿令吏又不更事惟下嶺表不下河北旬月後本州  
聞後約遂出官貞史未有郎官四人自行軍司馬賜紫  
而登郎署省中詭為四君子

郎士元詩句清絕絕輕薄好為劇語每云郭令公不琴  
馬鎮西不入茶田承嗣不入朝馬如此語之曰郎中言  
燧不入茶請左顧為設也即依期而往時豪家食次起

羊肉一斤層布於巨胡餅隔中以椒豉潤以酥入爐迫  
之後肉半熟食之呼為古樓子馬晨起啖古樓子以佇  
士元至馬喉乾如窯即命急烹茶二十飲十餘甌士元  
已老虛冷腹脹屢辭馬輒曰馬鎮西不入茶何遽辭也  
如此又七甌士元固辭而起及馬氣液俱下因病數旬  
馬乃遺絹二百匹

貞元初穆寧為和州刺史其子故宛陵尚書及給事列  
侍寧前時穆家法最峻寧命諸子直饌稍不如意則杖

之諸子至直日必探求珍異羅列鼎俎或未中意未嘗  
免筓筓一日給事直饌鼎前有熊白及鹿脩曰白肥而  
修瘠相滋其宜乎遂試以裹修改進寧果再飯宛陵與  
諸季視之喜形於色曰非惟免筓兼當受賞寧飯訖曰  
今日誰直可與杖俱來有此佳味奚進之晚

竇應中員外郎竇庭芝分司東都敬事卜者蒟蘆生言  
吉凶多中往來甚頻一日入門甚嘆惋庭芝問之曰君  
家大禍將至舉族無遺類庭芝惶恐問問所以避之者

云非遇黃中君鬼谷子不可救然黃中君難見但見鬼  
谷子當無患矣具說形貌服飾令決旬求之於是竇與  
兄弟羣從泊妻子奴僕曉夕求訪於洛下時李鄴侯居  
憂於河清縣騎驢入洛至中橋南遇大尹避道驢驚逸  
而走徑入庭芝所居與僕者共造其門值車馬將出忽  
見鄴侯皆驚視之俄有人出云此是分司竇員外宅所  
失驢收在馬厰請客入座員外嘗願修謁如此者數四  
不獲已就其第庭芝出降階而拜延接慇懃遂至信宿

至於妻孥咸備家人之禮數日告去贈送甚厚但云貴達之日願以一家為託鄴侯居於河清信使旁午於道

原注庭芝初與鄴侯相值蒟蘆生遽至其家云既遇此人無復憂矣及朱泚之亂庭芝方

為陝府觀察德宗幸奉天遂降賊平德宗首命誅之鄴侯自南嶽徵回因第賊臣罪狀請庭芝減死上不許云

卿以為寧王姻黨乎

原注庭芝姊為寧王妃

鄴侯俱白以舊事上

乃原其罪鄴侯始奏上密使中官夜乘傳陝州問之與庭芝云符合德宗曰黃中君蓋我也謂卿為鬼谷子何

也原注或云李氏之先君靈城在清谷前濁谷後恐以此言之

竇相易直幼時名秘家貧就業田里其師事老叟有道術而人不知一日或風雪暴至學童皆不果歸宿於漏屋下天寒爭近火唯竇相寢於榻夜深方覺叟撫公令起曰竇秘君後為人臣貴壽之極勉自愛也及德宗幸奉天易直方舉進士亦隨駕西行乘一蹇驢至開遠門路隘門將闔公懼勢不可進聞一人叱驢兼箠其後得疾馳而出顧見一黑衣卒呼曰秀才他日莫忘閭情及

拜相訪得其子提挈累至大官

趙璟盧邁二相皆吉州旅客人人呼趙七盧三趙相自微而著蓋為是姚廣女婿姚與獨孤問俗善因託之得作湖南判官累授官至監察蕭復相代問俗為潭州有人又薦於蕭蕭留為判官至侍御史蕭入主留務有美聲聞於德宗遂兼中丞為湖南廉使及李泌入相不知之俄而除贊璟既罷任遂入京李元素知璟湖南政事多善意甚慕之璟閒居慕靜深巷杜門不出元素訪之

甚頻元素乃是泌相之從弟也璟因其相訪引元素於青龍寺謂之曰趙璟亦自有官職誓不敢怨他人也非偶然耳蓋得於日者焉遂同訪之問元素年命謂之曰公亦富貴人也元素因自負言不言於泌相兄也德宗忽記得璟賜拜給事中泌相不測其由會有和戎使事出新相關播為大使張薦張式為判官泌因乃奏璟為副使未至西蕃右丞有闕宰相上名德宗曰趙璟堪為此官進拜右丞不數月遷尚書左丞平章事五年薨於



位此乃吉州旅人趙七郎之變化也

苗晉卿困於科舉一年似得復落春時攜酒乘驢出都門藉草而眠既覺有老父坐於傍因以餘杯飲之老父媿謝曰即君縈悒耶要知前事乎晉卿曰某應舉已久有一第乎曰大有事但問之苗曰某久窮羨一郡寧可及乎曰更向上廉察乎曰更向上苗乘酒遂曰將相乎曰更向上苗怒而不信因揚言曰將相更向上天子也老父曰真者不得假者即得苗以為怪誕揖之而去後

果為將相及德宗崩攝冢宰三日

司空曾為楊丞相炎判官故盧新州見之欲出之公見桑道茂道茂曰年內出官官名遺忘福壽果然

盧華州予之堂舅氏也常於元載宅門見一人頻至其門上下瞻顧盧疑其人乃邀以歸且問元相何如曰新相將出舊者須去吾已見新相矣一人緋一人紫一人街西住一人街東住皆慘服也然二人皆身小而不知姓名不徑旬日王元二相下獄德宗以劉晏為門下楊

炎為中書外皆傳說必定疑其言不中時國舅吳湊見  
王元事訖因賀德宗而起之曰新相欲用誰人德宗曰  
劉楊湊不語上曰五舅意如何言之無妨吳曰二人俱  
曾用也行當可見陛下何不用後來俊傑上曰為誰吳  
乃奏常袞及某乙翌日並用拜二人為相以代王元果  
如其說緋紫短小街之東西無不驗者

桑道茂之門有一嫗無所知大開卜肆自桑而卜問者  
必曰嫗於桑門賣卜必有異也筮畢必來覆之桑言休

則嫗言咎桑言咎則嫗言休厥後中否嫗桑各半

長安風俗貞元侈於遊宴其後或侈於書法圖畫或侈於博奕或侈於卜呪或侈於服食各有自也

順宗時五坊鷹犬恣橫州縣不能制多於民間張置罟或有誤傷一鳥雀者必多得金帛乃止時謂供奉鳥雀劉禹錫為屯田員外郎旦夕有騰超之勢知一僧有術數寓直日邀至省方欲問命報韋秀才在門外不得已見之令僧坐簾下韋獻卷已略省之意色頗倦韋覺告

去僧吁嘆良久曰某欲言員外心不愜如何員外後遷  
乃本曹郎中也然須待適來韋秀才知印處置禹錫大  
怒揖出之不旬日貶官韋乃處厚相二十餘年在中書  
禹錫轉為屯田郎中

韋崖州執誼自幼不喜聞嶺南州縣拜相日出外舍一  
見州郡圖遲迴不敢看良久臨起誤視乃崖州圖後竟  
貶於此

裴晉公度少時羈寓洛中常乘驢入皇城上天津橋時

淮西用兵已數年矣有二老人傍橋柱立相語云蔡州用兵日久徵發正困於人未知何時得平定忽覩裴公驚愕而退有僕携書囊後行相去稍遠聞老人云適憂蔡州未平須待此人為將既歸其僕白之裴曰見我龍鍾相戲爾其秋東府鄉薦明年登第及為相請討伐淮西遂平後守洛時對客每話天津橋老人事

裴中令應舉詣葫蘆生問命未之許謂無科級之分試日排高上門人馬擁併見一婦人類賈客之妻從女奴

皆衣服鮮潔挈一合以紫帕封女奴力勸置於門闌門  
闌失婦人所在合復在闌傍公以衫裾衛之意為他人  
所購冀其主復至舉人悉集公獨在門日晏終不去久  
之婦人方悲號公詰其冤抑以狀答曰夫犯刑憲其案  
已圓在朝夕某家素豐蓄一寶帶會有能救護者與數  
萬緡至羅錦悉不取唯須此帶今早晨親遣女使更持  
送忽失所在吾夫不免矣公識其主即以予之婦人再  
拜泣謝而去試不及免罷一舉他日復訪葫蘆生見

公驚曰君非去年相遇者耶君將來及第兼位極人臣  
蓋近有陰德

裴晉公為盜所傷諫人王義扞刃死之乃自為文以祭  
之厚給妻孥是歲進士為王義傳者甚衆

皇甫湜氣貌剛質性褊直為尚書郎乘酒使氣忤同列  
及醒不自適求分務洛都值洛中仍歲乏食正郎滯曹  
不遷俸甚微困悴甚常因積雪門無轍迹廚突無煙裴  
晉公保釐洛宅人有以為言者由是辟為留府從事公



常優容之先是公討淮西日恩賜鉅萬貯於集賢私第  
公素奉佛因盡捨所得再修福先寺既成將請白居易  
為碑湜曰近捨湜而遠徵白信獲戾於門下矣公曰初  
不敢以仰煩慮為大手筆見拒是所願也因請斗酒而  
歸獨飲其半乘醉揮毫立就又明日絜本以獻文思高  
古字復怪僻公尋繹久之歎曰木玄虛郭景純江海之  
流也

原注其碑在寺西北廊王石  
幢院洛中人家往往有本

命小將以車馬繪綵

器玩約千餘緡酬之湜省書擲於地面叱小將曰寄謝

侍中何相待之薄也湜之文非常流之文也曾與顧況  
為集序外未常造次許人者請製此碑蓋受恩深厚耳  
其詞約三千餘字每字三匹絹更減五分錢不得小校  
具以白公笑曰真不羈之才立遣依數酬之

原注其字  
共三千二

百五十有四計送絹九千七百六十有二後  
寺之老僧曰師約者細為人說其數亦同

白居易守府

及湜里第輦負相屬洛人聚觀之湜褊急之性獨異於  
人常為蜂螫手指因大躁忿命奴僕及里中小兒箕斂  
蜂窠以厚價購之頃之聚於庭則命以礪白絞取其汁

以塗所痛又其子松常錄詩數首字小誤大罵躍呼取杖不及齒其臂血流及肘

李汧公鎮宣武好琴書自造琴取新舊桐材扣之合律者裁而膠綴所蓄二琴殊絕其名響泉韻磬者也性不喜俗間聲音有二寵奴號秀奴七七善琴箏與歌時遣奏之自撰琴譜兵部員外郎約汧公之子也以近屬宰相子而有德量多材藝不邇聲色善接引入物而不好俗談晨起草裏頭對客感容便過一日多蓄古器在潤

州常得古鐵一片擊之清越養一猿名山公常與相隨  
常月夜獨泛江登金山擊鐵鼓琴猿必嘯和高陵令趙  
慘夫人韋氏即兵部之姨妹也說汧公徐夫人生二子  
中年於徐夫人小乖及兵部生情好復初而君於諸子  
中寶愛懸隔在官所俸祿付與從子一不問數唯給奉  
崔氏元氏二孀姊元氏亦有美行祭酒華陰公為之傳  
君初至金陵於李錡坐屢讚招隱寺之美一日錡宴於  
寺中明日謂君曰十郎常誇招隱寺昨遊宴細看何殊

州中君笑曰某所賞者疎野耳若遠山將翠幕遮古松  
用綵物裹腥羶浣鹿蹄泉音樂亂山鳥聲此則實不如  
在叔父大廳也錡大笑性又嗜茶能自煎曰茶須緩火  
炙活火煎活火謂炭火之有焰者也客至不限甌數竟  
日執茶器不倦常奉使行至陝州石碣縣東愛渠水留  
旬日忘發

李錡之擒也侍婢一人隨之裂帛自書管權之功言為  
張子良所賣教侍婢曰結之於帶吾若從容奏對當為

宰相楊益節度不得受極刑矣我死汝必入禁中上問汝當以此進及錡伏法京師大霧三日不解憲宗得帛書頗疑其寃內出黃衣一襲賜錡子救京兆收葬

孝明鄭太后潤州人也本姓爾朱氏相者言其當生天子李錡據浙西反納之錡誅後入掖庭為郭太后侍兒憲宗皇帝幸之生宣宗即位尊為太后懿宗立尊為太皇太后又七年崩以郭太后配饗出祭別廟

段相文昌少寓江陵甚貧窶每聽曾口寺齋鐘動詣寺

求食寺僧厭之乃齋後扣鐘冀其來不逮食後登台輔  
出鎮荆南題詩曰曾遇閣梨飯後鐘文昌晚貴以金蓮  
花盆盛水濯足徐相商以書規之文昌曰人生幾何要  
酬平生不足也

原注或曰此詩  
是王相描事

文昌少孤寓居廣陵之瓜洲家貧力學夏月訪親知於  
城中不遇饑甚於路中捨得一錢道旁買瓜置於袖中  
至一宅門闐然入其廐內以瓜就馬槽破之方啗次老  
僕聞擊槽聲躍出責以擅入廐驚懼棄之而出鎮淮海

常對賓客說之在中書廳事地衣皆綿繡諸公多撤去而文昌每令整飭方踐履同列或勸之文昌曰吾非不知常恨少貧太甚聊以自慰爾

元和中老卒推倒平淮西碑官司鉞其項又以枷擊守獄者憲宗怒命縛來殺之既至京上曰小卒何故毀大臣所撰碑卒曰乞一言而死碑文中有不了語又擊殺陛下獄卒所願於間奏文中美裴度不還李愬功是以不平上命釋縛賜酒食敕翰林學士段文昌別撰案



愬妻入訴禁中乃命段文昌撰文其時碑尚未立安得推倒

于襄陽云今之方面權勝于列國諸侯遠矣且頓押一字轉牒天下皆供結承面列國止于我疆而已不亦勝乎

于司空以樂曲有想夫憐其名不雅將改之客笑曰南朝相府會有瑞蓮故歌曰相府蓮自是後人語訛乃不改古解題曰相府蓮者王儉為南齊相一時所辟皆才

名之士時人以入儉府為入蓮花池謂如紅蓮映綠水  
令號蓮幕者自儉始其後語訛為想夫憐亦名之醜爾  
又有簇拍相府蓮樂苑曰想夫憐羽調曲也白居易詩  
曰玉管朱絃莫急催客聽歌送十分盃長愛夫憐第二  
句倩君重唱夕陽開王維右丞詞云秦州一半夕陽開  
是也夜間隣婦泣切切有餘哀即問緣何事征人戰未  
迴簇拍相府蓮莫以今時寵寧忘舊日恩看花滿眼淚  
不共楚王言閨燭無人影羅屏有夢魂近來音耗絕終

曰望應門

衛侍郎次公在吏部避嫌宗從皆不注疑有從子申甫  
自江淮來調選因告主吏曰但得官便出城即可矣遂  
館申甫於別第未幾撥江南令將出城為次公老僕所  
遇不得已見次公次公詰其由申甫以實對次公曰今  
年所注不省有汝姓名驗其纖名則次公署之也迺召  
主吏貸其罪以問之吏曰凡所取押皆冒於公歎曰某  
慮不及此遂遣赴官

王智興以使侍中罷鎮歸京親情有以選事求囑智興固不肯應選人懇請遂致一銜與吏部侍郎吏部印尾狀元選人名銜謹領訖智興曰不知侍中亦有用處崔相羣之鎮徐州常以焦氏易林自筮遇乾之大畜其繇曰典束法書藏在蘭臺雖遭亂潰獨不遇災及經王智興之變果除秘書監

元和十五年太常少卿李建知舉放進士二十九人時崔緥舍人與施肩吾同榜肩吾寒進為緥瞽一目曲江

宴賦詩肩吾云去古成段著蟲為蝦二十九人及第五十七眼看花

裴坦為職方郎中知製誥裴相休以坦非才不稱力拒之不能得命既行坦至政事堂謁謝丞相故事謝之便於本院上事宰臣送之施一榻壓角坐而坦巡謁執政至休多輸感激休曰此乃首台謬選非休力也立命肩與便出不與之坐兩闌老吏云自有中書未之有此人為坦恥之至坦知貢舉擢休子宏上第時人稱欲益而

彰

劉虛白與太平裴垣相知垣知舉虛白就試因投詩曰  
三十年前此夜中一般燃燭一般風不知人世能多許  
猶著麻衣待至公坦感之與及第

安邑李相公吉甫初自省郎為信州刺史時吳武陵郎  
中貴浮人也將欲赴舉以哀情告州特贈布帛數端吳  
以輕鮮以書讓焉其詞唐突不存桑梓之分並却其禮  
李公不悅妻諫曰小兒方求成人何得與舉子相忤遂

與米二百斛李公果感之元和二年崔侍郎邠重知貢  
舉酷搜江湖之士初春將放二十七人及第持名來呈  
相府繞見首座李公公問吳武陵及第主司恐之是舊  
知遽言及第其榜尚在懷袖忽報中使宣口敕且揖禮  
部從容遂注武陵姓字呈李公公謂曰吳武陵至鹿麕人  
何以當科第禮部曰吳武陵德行未聞文筆乃堪採錄  
名已上榜不知却也相府不能移唯唯而從之吳君不  
附國庠名第在於榜末是日既集省問謂同年曰不期

崔侍郎今年倒注榜也觀者皆訝焉

永寧王二十光福王八二相皆出於安邑之李丞相之  
門安邑薨於位一位素服受慰一王則不然中有變色  
是誰過乎又曰李安邑之為淮海也樹置裴光德及去  
則除授不同李再入相對憲宗曰臣路逢中人送節與  
吳少陽不勝憤憤聖賢赧然翌日罷李丞相蕃為太子  
詹事益與節是蕃之謀也又論征元濟時饋運使皆不  
得其人數曰罷光德為太子客賓主饋運者裴之所除



也劉禹錫曰宰相皆用此勢自公孫弘始而增穩妙焉  
但看其傳當自知之蕭曹之時未有斯作

劉禹錫守連州替高霞寓後入為羽林將軍

樂唐書高霞寓傳霞

寓由歸州刺史入為右衛大將軍與劉禹錫之守連州無涉疑有脫誤自京附書曰以承

眷輒請自代矣公曰感然有一話曾有老嫗山行見一  
獸如大蟲羸然跬步而不進若傷其足者嫗因即之而  
虎舉前足以示嫗嫗看之乃有芒刺在掌下因為拔之  
俄而奮迅門吼別嫗而去以媿其恩者及之翌日自外

擲麋鹿孤兔至於庭者日無闕焉嫗登垣視之乃前傷  
虎也因為親族具言其事而心異之一旦忽擲一死人  
血肉狼籍乃村人被凶者呵捕云殺人嫗具說其由始  
得釋縛乃登垣向其虎至而語之曰感則感矣叩頭大  
王已後更莫拋人來也

劉禹錫曰史氏所貴著作起居注士筆於螭首之下人  
君言動皆書之君臣啓沃皆記之後付史氏記之故事  
也今起居惟寫除目著作局可張崔羅不亦倒置乎

劉禹錫曰大抵諸物須酷好則無不佳有好騎者必畜好馬有好琴者必善彈皆好而別之不必貴富而亦獲之韋絢曰蔡邕焦尾王戎牙籌若不酷好豈可得哉

劉禹錫曰韓十八愈直是太輕薄謂李二十六程曰某與丞相崔大羣同年往還真是總明過人李曰何處是過人者韓曰共愈往還二十餘年不曾過愈論著文章此是敏慧過人也

韓十八初貶之制席十八舍人為之詞曰早登科第亦

有聲名席既物故友人曰席無令子弟豈有病陰毒傷寒而與不潔喫耶韓曰席十八喫不潔太遲人問曰何也曰出語不是當益念其責詞云亦有聲耳

韓退之有二妾一曰絳桃一曰柳枝皆能歌舞初使王庭湊至壽陽驛絕句云風光欲動別長安春半邊城特地寒不見園花兼巷柳馬頭惟有月團團蓋有所屬也柳枝後踰垣遁去家人追獲及鎮州初歸詩曰別來楊柳街頭樹擺弄春風只欲飛還有小園桃李在留花不

放侍郎歸自是專寵絳桃矣

元和中即吏數人省中縱酒話平生各言愛尚及憎怕者或言愛圖畫及博奕或怕妾與工部員外汝南周愿獨云愛宣州觀察使怕大蟲

初百官早朝必立馬建福望仙門外宰相則於先宅車坊以避風雨元和初始置待漏院

元和末有勅申明父子兄弟無同省之嫌自是楊於陵任尚書其子姪兄弟分曹者亦有數人

沙陀本突厥餘種元和中三千人歸順隸京西節度使  
范希朝主之弓馬雄勇冠於諸蕃

進士何儒亮自外方至京師將謁從叔誤造郎中趙需  
宅自云同房會冬需欲家宴揮霍之際既是同房便入  
宴姑姊妹盡在列儒亮饌徹徐出細察乃何氏子需笑  
而遣之某按此事是趙贊侍郎與文哲尚書之相與鄰  
居時俱侍御史水部趙郎中需方應舉自江淮來投刺  
於贊誤造何侍御第何武臣也以需進士稱猶子謁之

大喜因召入宅不數日值元日骨肉皆在坐文哲因謂  
需曰姓之名宜改之且何需似涉戲於姓也需乃以本  
氏告文哲大愧乃厚遣之而促去需之孫頊前國學明  
經文哲姓孫繼為杭之戎吏皆說之相符而並無儒亮  
之說國史補所記乃誤耶

西蜀官妓曰薛濤者辯慧知詩嘗有黎州刺史

原注失  
姓名

作千字文令帶禽魚鳥獸乃曰有虞陶唐坐客忍笑不  
罰至薛濤云佐時阿衡其人謂語中無魚鳥請罰薛笑

曰衡字尚有小魚字使君有虞陶唐無一魚字賓客大笑刺史初不知覺

白太傳與元相國友善以詩道著名時號元白其集內有詩說元相公云相看掩淚應無說離別傷心事豈知想得咸陽原上樹已抽三丈白楊枝洎自撰墓誌云與劉夢得為師友殊不言元相公時人疑其隙終也

李賀為韓文公所知名聞搢紳時元相稔以明經擢第亦善詩願與賀交李賀還刺曰明經及第人何事看李



賀元恨之制策登科及為禮部郎中因議賀父名晉肅不合應進士竟以輕薄為眾所排文公惜之為著諱辨竟不能上

長慶初李尚書絳議至即官十八分判南曹吏人不便後出為東都留守自是選曹成狀常得速畢

山甫以石留黃濟人嗜欲多暴死者其徒盛言山甫與陶貞白同壇受之以神之長慶二年卒於干江江西觀察使王仲舒遍告人山甫老病而死速朽無少異於人

者

令孤楚鎮東平絢侍行當送親郊外逆旅中時久旱絢  
因問民間疾苦有老父曰天旱盜賊且起復曰今風不  
鳴條雨不破塊絢以相反詰之荅曰自某日不雨至於  
是月豈非不破塊乎賦稅徵迫販妻鬻子不給繼以桑  
枝豈非不鳴條乎

鎮州王庭湊始生常有鳩數十隻朝集庭樹墓集簷下  
里人駭德播異之及長駢脅善陰符經鬼谷子初仕軍

中曾使河陽道中被酒寢於路傍忽有一人荷策而過  
熟視之曰貴當列土非常人也從者告之庭湊馳數里  
追及至敬而問自云濟源駱山人也向見君鼻中之氣

左如龍右如虎龍虎交王應在今秋

原注一云吾相人未有如此者

子

孫相繼滿一百年又云家之庭合有大樹樹及于堂是  
其兆也是年庭湊為三軍所立歸省別墅而庭樹婆娑  
陰已合矣

田令既為王庭湊所害天子召其子布於涇州與之發

哀授魏博之節布乃盡出妓樂拊膺大哭曰吾不回矣  
次魏郊三十里跣行被髮而入後知力不可執密為遺  
表伏劍而死

長慶中京城婦人首飾有以金碧珠翠笄櫛步搖無不  
具美謂之有不知婦人去眉以丹紫三四橫約於目上  
下謂之血暈粧

寶曆中敬宗皇帝欲幸驪山時諫者至多上意不決拾  
遺張權輿伏紫宸殿下叩頭諫曰昔周幽王幸驪山為

卷六  
戎所殺秦始皇葬驪山國亡明皇帝宮驪山而祿山亂  
先皇帝幸驪山而享年不長辛曰驪山若此之凶耶我  
宜往以驗彼言後數日自驪山回語親倖曰叩頭者之  
言安足信哉

文宗在藩邸好讀書王邸無禮記春秋史記易尚書  
毛詩論語雖有少成部帙宮中內官得周易一部密獻  
上即位後捧以隨輦及朝廷無事覽書目間取書便殿  
讀之乃詔兵部尚書王起禮部尚書許康佐為侍講學

士中書舍人柳公權為侍讀學士每有疑義召學士入  
便殿顧問討論率以為常時謂三侍學士恩寵異等於  
是康佐進春秋列國經傳六十卷上善上問康佐曰吳  
人伐越獲俘以為閭使守舟餘祭觀舟閭以戈殺之聞  
是何人殺吳子復是何人康佐遲疑久之對曰春秋義  
與臣窮究未精不敢遽解上笑而釋卷

藍田縣尉直弘文館柳珪擢為右拾遺弘文直學士給  
事中蕭倣鄭裔綽駁還制曰陛下懸爵位本待賢良令

命澆浮恐非懲勸柳珪居家不稟義方奉國宣盡忠節  
刑部尚書柳仲郢詣東上閤門進表稱子珪才器庸劣  
不當玷居諫垣若誣以不孝即非其實太子少師柳公  
權亦訟侵毀之枉上令免卦官家居修省貞元元和已  
來士林家禮法推韓臯韓滉柳公綽柳仲郢一旦子稱  
不孝為士歎之

韋溫遷右丞文宗時姚勗按大獄帝以為能擢職方員  
外郎繼上言即官清選不可賞能吏帝問故揚嗣復對

曰勗名臣後行治無疵若吏才幹而不入清選他日孰肯當劇事者此衰晉風不可以法

太和三年在拾遺舒元褒等奏中丞溫造凌供奉官事  
今月四日左補闕李虞中與溫造街中相逢造怒不迴  
避遂擒李虞中祇奉人笞其背者臣等謹按國朝故事  
供奉官中除宰相無所迴避

陳夷行字周道文宗時仙韶樂工尉遲璋授王府率石  
拾遺李洵直當銜論奏鄭覃楊嗣復嫌以細故謂洵直



近名夷行曰諫官當衙正須論宰相得失彼賤工安足  
言然亦不可置不用帝即徒璋

新昌李相紳性暴不禮士鎮宣武有士人遇於中道不  
避乃為騶所拘紳命鞠之乃宗室也答款曰某勤政樓  
前尚容緩步開封橋上不許徐行汴州豈大於帝都尚  
書未尊於天子公鑒之失色使逸去

武翊黃府送為解頭及第為狀頭宏詞為頭時謂武  
三頭冠於一時後惑於媵嬖薛荔苦其冢婦盧氏雖新

昌李相紳以同年底之而衆論不容終流竄

王并州璠自河南尹拜右丞相除目纔到少尹侯繼有宴以書邀之王判後云新命雖聞舊銜尚在遽為招命堪入笑林洛中以為口實故事少尹與大尹遊宴禮隔雖除官亦當俟正敕也

王沐王涯之再從弟也家於江南老且窮以涯作相騎驢至京師三十日始得見涯所望不過一簿尉耳而涯見其潦倒無推引意太和九年秋涯于涯之嬖奴道以

所欲涯始一日許以微官處之自是旦夕造涯及涯誅仇士良收捕涯家族時沫方在涯宅以王氏之宗同坐舒守謙即元興之宗十年居元興舍未嘗一日有閒坐於車服飲饌亦無異等元興謂之從子取明經及第歷秘書郎及持相應列清曹命之無何忽之以非過怒守謙朔旦伏謁訓不得見僮僕皆拒之守謙乃亂往江南元興亦不問翌日長長咨嗟自失行及昭之應聞元興之禍

原注時宰相守捕家族不問親疏皆戮

禍者以王舒福禍之異皆若

分定焉

鄭注以方術進學引朋黨薦周易博士李訓召入內署  
為侍講周易學士敏捷有口辯涉獵五經言及左氏以  
探上意上幸蓬萊殿閱書召訓問曰康佐所進春秋列  
國經傳朕覽之久矣戰國時事厯厯明白朕曾問康佐  
吳人伐越獲俘以為閹殺吳子餘祭康佐云窮究未精  
卿謂如何訓曰吳人伐越獲俘俘即罪人如今之所謂  
生口也不殺下之空肉刑故謂之閹寺即今之中使也

吳子是國君長餘祭名也使中使主舟守楫餘祭往觀之為中使所殺上嗟嘆訓曰君不近幸臣近刑臣即輕死之道也吳子遠賢良親刑臣而有斯禍魯史書之以垂鑒戒上曰左右密近刑臣多矣餘祭之禍安得不慮訓曰陛下之聖留意於未萌若欲去泰去甚臣願遵聖算累聖知之而不能遠慮之而不能去審旨如此天下幸甚時鄭注任工部尚書侍講學士乃與訓片逐賢良陰搆姦之遂有甘露之事

太和初京師有經簿徒取貢士姓名以義理編飾為詞號為舉人露布九年冬就戮者多是儒士

李瓚故相宗閔之子自桂州失守貶昭州司戶後量移衛州刺史給事中柳韜疎之復貶韜始與瓚相善瓚先達而弃韜瓚既重為所貶性强躁憤且死鄭舍人穀之父瓚坐主也乃為書曰與穀受恩未穀極苦累十點筆

落而卒

案此條末數語解解疑有脫誤

李司徒程善謔為夏口日有客辭焉相留主三兩日客

曰業已久矣舟脫已在漢口曰此漢曰不足信又因與  
堂第居守相石投盤飲酒居守誤收頭子紉者罰之司  
徒曰汝何忙鬧時把堂印將去又何辭焉飲家謂重四  
為堂印蓋譏居守太和九年冬朝廷有事之際而登庸  
也又與石話服食云汝服鍾乳否曰近服甚覺得力司  
徒曰吾一不得乳力蓋譏其作相日無急難之效也又  
嘗於街西遊宴貪在博局時已昏黑從者迭報云鼓動  
司徒應聲曰靴靴其意譏鼓動似受慰之聲以弔客靴

靴荅之連聲索靴靴其意謔也又在夏口時官園納芋頭而餘者分給校其主將報之軍將謝芋頭司徒之手拍頭云著他了也然後傳語此芋頭不必謝也

徐晦嗜酒沈傳師善餐楊嗣復云徐家肺沈家脾其安穩耶

杜棕通貴日久門下有述士李生者甚異棕任四州節度馬植罷黔中方起關李一見謂棕曰受相公恩久思以報荅今有所報矣黔中馬中丞非常人也相公當厚



遇之惊未之信他日又謂惊曰相公將有禍非馬中丞  
不能救乞厚結之惊始驚乃用其言發日厚幣贈之仍  
令即吏為植於闕下買宅為生之費無闕焉尋除光祿  
卿報狀之蜀惊謂李曰貫人越闕作光祿勲矣李曰姑  
待之稍進大理卿遷刑部侍郎充鹽鐵使惊始信之未  
幾拜相懿安皇太后崩惊懿安子壻也忽因嬖子索檢  
責宰相元載故事植詣旨延英力勞救植素能回上意  
事遂止

杜郊公惊嘗與列言平生不稱意有三其一為之澧州  
刺史其二貶司農卿其三自西州移鎮廣陵舟次瞿塘  
遇風侍者驚廢渴甚曰潑茶飲後鎮荆南諸院姊多  
在渚宮寄寓相國未常拯濟節臘一無需遺有肩輿  
至府門詬罵者亦不省問所在方鎮不理獄訟在鳳翔  
洎西門繫囚無輕重任其殍殍人有從劍門得漆器文  
書乃成都具獄案牘也

歐陽琳父充亦中進士琳與弟玘同在場屋苦其貧賈

每詣先達刺輒同幅時人稱之杜郊公在岐下以子喬  
休同年謁之惛嘗以事怪琳客或有為釋解者之且言  
琳究之子惛不荅久之曰某自淮南越闕舟次龜山風  
不可進因策杖登岸徐步適見一僧方修道前曰雪山  
和尚弟子教化某謂之曰何言弟子饒你和尚也

開成中有龍復本者無目善聽揣骨言休咎象簡竹筭  
以手循之必知官祿年壽宋邱補闕有時名搢紳靡不  
傾屬時永樂蕭相寘亦居諫官同日詣之授以所持筭

復本聽蕭笏良久置於案上曰宰相笏次至宋笏曰長  
官笏元不樂月餘同列於中書侯見宰相時李衛公方  
秉政未見間佇立談詭頃之丞相出宋以守板障面笑  
未已李公目之謂左右曰宋補闕容某可事聞者為憂  
之數日出為河清縣令歲餘死其後蕭公自浙西觀察  
使入判戶部頃之為宰相

文宗時有沙門能改塔履險若平換塔杪一柱人以為  
神上聞之曰塔固當人功所建然當時匠者豈亦有神

沙門後東果以妖妄伏法

盧尚書弘宣與弟衢州簡辭同日在京師一日州早出  
尚書問有何除改答曰無大除改唯皮遐叔蜀中刺史  
尚書不知皮是遐叔姓謂是宗人曰我彌當家沒處得  
盧皮遐來衢州為辨之皆大笑

唐語林卷六